



74  
6264  
24

四



74  
6264  
24

唐會要卷九十七



吐蕃  
宋王溥撰

吐蕃者在長安西八千里本漢西羌之種也不知有國之所由或云南涼秃髮利鹿孤之子曰樊尼國滅之後西奔於羌中建國為眾所懷故姓宰勃野或云以秃髮為國號語訛謂之吐蕃歷魏及隋隔闕諸羌未通中國號其王為贊普自中國出鄯城五百里過烏海入吐谷渾部落彌多彌蘇毗及白蘭等國至吐蕃界其國風雨雷電每隔日有之盛夏氣如中國暮春之月山有積雪地有冷瘴令人氣急不

宋王溥撰  
五味均平



甚爲害其俗重漢繒而貴瑟瑟男女用爲首飾其君長或居拔布川或居邏婆川有小城而不居坐大氊帳張大拂廬其大可容數百人兵衛極嚴而衙府甚狹俗養牛羊取乳酪供食兼取毛爲褐而衣焉不食驢馬肉以麥爲麩人死殺牛馬以徇取牛馬頭周壘於墓上其墓正方壘石爲之狀若平頭屋焉其臣與君自爲友號曰共命人其數不過五人君死之日共命人皆日夜縱酒葬日於腳下刺血出盡及死便以殉葬又有親信人用刀當腦縫鋸亦有將四尺木大如指刺兩肋下死者十

有四五亦殉葬焉設官父死子代絕嗣則近親襲焉非其種類輒不相代其官章飾有五等一謂瑟瑟二謂金三謂金飾銀上四謂銀五謂熟銅各以方圓三寸褐上裝之安膊前以辨貴賤其戰必下馬列行而陣死則遞收之終不肯退槍細而長於漢者弓矢弱而甲堅人皆用劔不戰亦負劔而行其驛以鐵箭爲契其箭長七寸若急驛膊前加一銀鶻有草名速古芒葉二寸狀若斜蒿有鼠尾長於常鼠其國禁毀鼠殺之者加其罪有可跋海去赤嶺百里方圓七十里東南流入蠻與西洱河

合流而東號為漾鼻水又東南出會川為瀘水焉自赤嶺至邏婆川絕無樹木唯有楊柳人以為資國置大論統理國事無文字刻木結繩為約徵兵用金箭寇至舉燧與臣下一年一小盟用羊狗三年一大盟用犬馬以麥熟為歲首其國都號為邏些城用法則嚴整議事則自下而起因人所利而行之此其所以強且久也重壯賤老母拜於子重兵死惡病終以累世戰沒者以為甲門臨陣奔逃者懸狐尾於其首表其似狐之怯其贊普弄讚雄霸西域

貞觀八年九月朝貢使至十四年遣其相祿東贊致禮請婚姻獻金五千兩自餘寶玩數百事十五年以文成公主妻之弄讚至柏海親迎於河源見王人執子婿之禮甚恭而歎大國禮儀之美俯仰有媿沮之色及與公主歸國謂所親曰我祖父未有通婚上國者今我得尚大唐公主為幸實多當為公主築一城以誇示後代遂築城立棟宇以居處焉公主惡其赭而弄讚令國中權且罷之身釋氊裘襲紉綺漸慕華風仍遣酋豪子弟請入國學以習詩書又請中國識文字之人典其表疏上

唐會要 卷九十一  
征遼還獻大鵝黃金鑄成高七尺可受酒三斛高宗卽位拜駙馬都尉封西海郡王致書於長孫無忌云天子初卽位若臣下有不忠之心者當勒兵以往並獻金銀珠寶十五種請置太宗靈座之前高宗進封賓王因請蠶種及造酒碾硯紙筆之匠並許之

永徽元年弄讚卒其子早卒立其孫立年幼國事皆委祿東贊祿東姓築氏有謀畧初太宗許降文成公主東贊來迎召見顧問進對合旨乃拜爲右衛大將軍又以琅邪公主孫女妻之東贊辭曰臣本國有婦父母所聘

情不忍乖且贊普未謁公主陪臣安敢妄婚上嘉之東贊有子五人長贊悉若早卒次欽陵三贊婆四悉多于五勃論及東贊死欽陵兄弟復專其國

通天元年薛仁貴爲欽陵所敗於大非川

上元二年李敬元又敗於青海欽陵多居中諸弟分鎮方面贊婆則專在東境與中國爲鄰三十餘年恆爲邊患

儀鳳三年上以李敬元初敗吐蕃爲患轉甚召侍臣曰吐蕃小醜屢犯邊境置之則疆場日駭圖之則未聞上

策宜論其得失各書所懷給事中劉景先曰攻之則兵威不足鎮之則國力有餘且撫養士卒守禦邊境中書舍人郭正一曰吐蕃作梗年歲已深興師不絕非無勞費近討則徒損兵威深入則未窮巢穴臣望少發兵募且遣備邊明立烽候勿令侵掠待國用豐足一舉而滅之給事中皇甫文亮曰且令大將鎮撫畜養將士仍命良吏營田以收糧儲必待足兵足食方可以舉而取之上曰宿將舊人多從物故自非投戈俊傑安能克滅兇渠中書舍人劉禕之曰臣觀自古聖主明君皆有夷狄

爲梗今吐蕃憑陵未足爲恥願暫戢萬乘之威以寬百姓之役給事中楊思忠曰聖人御物貴在從時今兇寇不能懷德未肯畏威和好之謀臣謂非使中書侍郎薛元超曰臣以爲敵不可縱縱敵則患生邊不可守守邊則卒老不如料簡士卒一舉滅之上願謂黃門侍郎來恆曰李勣已後實無好將當今以張虔勛紀及善等差爲優耳恆曰昨者洮河兵馬足堪制敵但爲諸將失於部分遂無成功今無好將誠如聖旨

聖歷二年贊普器弩悉弄年漸長不平乃與大臣論巖

密計去之召欽陵執其親黨二千餘人殺之欽陵自殺  
神龍元年其贊普器弩悉弄卒其子棄肆躡贊嗣位贊  
時年七歲使來告喪中宗爲之舉哀廢朝一日俄而棄  
肆祖母遣使獻金二千兩爲棄肆求婚中宗以所養雍  
王女降嫁之自是頻歲貢獻然亦時犯西邊門封源水  
景龍四年來請婚以左衛大將軍楊矩爲送金城公主  
使後矩爲鄯州都督吐蕃厚賂之因請河西九曲之地  
以爲公主湯沐之邑矩遂奏與之吐蕃旣得九曲其地  
肥良又與唐境接近自後復叛楊矩懼飲藥而死實曰

先天元年十月二十六日吐蕃遣使來朝  
開元二年五月吐蕃宰相全達延陀獻書於宰相曰兩  
國地界事資早定界定之後然後立盟其月吐蕃使其  
宰相尙欽藏及御史名悉獵來獻盟書元宗御承天門  
樓命有司引見置酒於內殿宴遣之其月全達延陀率  
眾侵我渭源帝下制親征會薛訥遇賊數萬眾戰於武  
階驛大破之乃罷自五年至十年凡八來朝並貢方物  
十三年遣使來賀不許

方使於吐蕃惟明既見贊普及公主皆欣然請和盡出  
貞觀以來勅書以示惟明及遣其重臣名悉獵隨惟明  
入朝贊普既獻寶公主又獻盤雜蓋器等物悉獵頗曉  
書記先是迎公主至長安當時朝廷皆稱有才辨及引  
入賜宴與語甚禮之詔御史大夫崔琳充使宣諭於赤  
嶺各樹分界之碑約不相侵

二十一年二月金城公主上言請以今年九月一日樹  
碑於赤嶺定蕃漢兩界時李嵩使於蕃金城度其還期  
當在暮秋故有是請及樹之日詔張守珪李行禕與其

使莽布支同訖其事是月遣其大臣屬盧論莽藏來朝  
及獻方物自二十二年每歲遣使賀正並貢獻至二十  
九年七月金城公主薨遣使告哀仍請和不許使到數  
月始命有司爲公主於光順門發哀輟朝三日天寶中  
連事西討進收黃河九曲拔其石堡城

至德二載三月復遣使請和且助國討逆詔遣南巨川  
報之明年二月又遣使來朝復請盟詔從之

大歷元年至十年七來朝貢十三年正月遣將馬重英  
率眾四萬侵靈州奪我水口填漢渠御史渠以弊屯田



唐會要 卷九十七 七  
建中元年正月入蕃使太常少卿韋倫至自大曆已後吐蕃陷我河隴諸州聘使前後數輩皆留之不遣邊上每俘獲其人亦令中官部統徙之江嶺德宗初卽位務以德綏遠方徵其俘囚五百人給衣一襲使韋倫給還其國與之約和仍勅邊將無得侵伐吐蕃始聞歸其人

不之信及蕃俘入境部落皆畏威懷惠焉又命倫爲太常卿復使吐蕃其年十二月倫至自蕃中與其宰相論欽明思等五十五人皆至獻其方物吐蕃見倫再至甚歡旣就館聲樂以娛之留九日而旋兼遣其渠帥報命

倫一歲再往絕域戎夷奉教無此之速也

二年三月以萬年縣令崔漢衡爲殿中少監持節使西戎初吐蕃遣使求沙門之善講者至是遣僧良琇文素二人行每人歲一更之其年十二月入蕃使判官監察御史常魯與吐蕃使論悉諾羅等至自蕃中奏請改勅書以貢獻爲進以賜爲寄以領取爲領之優詔降諭曰前相楊炎不循故事致此誤耳並從之

三年九月崔漢衡與蕃使區頽贊至自吐蕃乃約靈州以賀蘭涇州以彈箏峽西口隴州以清水爲漢界皆建

碑以誌之期以是年十月十五日相與同盟於境上其  
年十月以都督員外郎樊澤兼御史中丞充吐蕃計會  
使約以來年正月十日會盟於清水

四年正月詔隴右節度使張鎰與吐蕃使尙結贊等於  
清水會盟官崔漢衡等七人與結贊及宰相等七人俱  
昇壇爲盟夏四月吐蕃將先沒蕃將士僧尼等至自沙  
州凡八百人報元年之德

貞元元年九月遣左監門衛將軍康成使於蕃中且定  
界十月鳳翔節度使李晟遣兵襲吐蕃於推沙堡大破  
之焚其儲積斬蕃酋扈屈律設贊等七人傳首京師結  
贊等聞而大懼累遣使請和仍約盟會上皆不許會馬  
燧自河東至且保明其誠至乃許之

二年九月吐蕃遊騎及於好時京師戒嚴上遣左金吾  
衛將軍張獻甫等統兵屯於咸陽其月二萬餘眾又寇  
鳳翔城下李晟出兵禦之一夕而退其年十一月吐蕃  
陷我鹽州初賊之來寇也刺史杜彥光使以牛酒犒之  
吐蕃謂曰我欲州城居之聽爾率其人而去彥光乃率  
眾奔鄜州其年十一月吐蕃陷夏州亦令刺史拓拔乾

唐會要 卷九十一  
九  
曜率眾而去復據其城自是又寇銀州銀州素無城壁  
居者奔散蕃亦棄之

三年二月以前太子右諭德崔澣爲檢校左庶子兼御  
史中丞充入蕃使四月至自鳴沙不數日澣復以鴻臚  
卿兼中丞又充入蕃使令澣報蕃宰相尙結贊曰杜希  
全職在靈州不可出境李觀又已改官遣侍中渾瑊充  
盟會使約以五月二十四日復盟於清水又令告尙結  
贊以鹽夏二州歸於我然後就盟會其年夏吐蕃背盟  
於平涼城

八年九月劔南西川節度使韋臯攻吐蕃之維州獲大  
將軍輸贊熱以獻十一月山南西道節度使嚴震奏擊  
破吐蕃於芳州及黑水堡焚其積聚并獻首俘  
十年五月劔南西川節度使韋臯又奏西山峨和城擊  
破吐蕃二萬餘眾攻拔城柵斬首三千八百餘級獲其  
器械牛馬其年八月先沒蕃中使李朝清歸自吐蕃  
十三年正月贊普遣使農索昔齋表請和好帝以其豺  
狼之性數負恩約不受表狀任其使卻歸七月韋臯奏  
去年二月十七日吐蕃於劔山馬嶺三路分軍下營僅

唐會要 卷九十七  
十一月進軍逼臺登城雋州刺史曹高任率諸軍將士  
并東蠻子弟合勢接戰自朝及午大破之生擒大籠官  
七人陣上殺獲甚眾

十七年七月吐蕃陷我麟州殺刺史郭鋒毀城隍大掠  
居人驅黨項部落而去次鹽州西九十里橫槽烽頓軍  
有蕃卒傳呼延州僧延素輩七人稱徐舍人召其火隊  
吐蕃沒勒遽引延素等疾趨至帳前皆馬革楛手麻繩  
縲頸見一吐蕃年少身長六尺餘朱髭大目乃徐舍人  
也命解縛坐帳中曰師勿懼予本漢人司空英公五代

孫也屬武后斲喪王室余高祖建義中泯子孫流播絕  
域今三代矣雖代居戎職位掌兵要思本之心無涯故  
血族無由自拔耳此蕃漢交境也復九十里至安樂州  
師無由東矣延素曰僧身孤親老敢祈全活悲不自勝  
又曰余奉命率師備邊因求資食遂涉漢疆展轉東進  
至麟州城下城既無備援兵又絕是以拔之知郭使君  
是勳臣子孫必將活之不虞爲亂兵所害適有飛鳥使  
至飛鳥猶中國驛騎也云術者上變召軍亟還遂解縛  
歸之時詔命韋臯分遣偏將勒步騎合二萬出成都西

山南北九道並進逼棲雞老翁故維州保州松州諸城以紓北邊故也其年九月韋臯又奏大破吐蕃於維州十八年正月韋臯又破吐蕃生擒大首領論莽熱來獻至二十年三月以吐蕃贊普卒廢朝三日命工部侍郎兼御史大夫張薦弔祭之四月吐蕃使臧河南觀察使論乞冉等五十四人來朝貢至二十一年七月贊普使論乞縷勃藏來奉獻德宗皇帝山陵金銀衣服牛馬等陳於太極殿庭元和元年七月遣使論勃藏等來朝并獻方物

五年春以吐蕃俘人歸於西蕃虜遣使論思邪熟來朝并歸鄭叔矩路泌之柩及叔矩男文延等一十三人叔矩貞元初平涼背盟所陷凡二十餘年竟不屈節其年五月命宰臣杜佑等與吐蕃使議事於中書令廳且言歸我秦原安樂州地自六年至十年遣使朝見并獻方物相繼不絕

十一年西川奏吐蕃贊普卒

十二年吐蕃告哀使論乞冉獻馬十四匹玉帶金器等

十三年宴吐蕃使於中書八月吐蕃使論司熱等七人

辭於宣政衙已事不退且徵國使詔有司諭之方出勅  
今後入迴鶻吐蕃南詔使所奏隨從不得過二十人新  
羅使不得過二十人迴鶻吐蕃使下合授正官不得過  
十人南詔不得過五人其年十月吐蕃圍我有州命夏  
州兵擊退之

十四年三月詔蕃使論矩立藏等并後般來使並宜放  
歸本國八月寇我鹽州及慶州方渠下營大軍至河州  
界其年復遣論矩立藏來朝貢立藏自稱曰和好詔納  
其請遣還其年十月以太子中允張賈爲太府少卿攝

御史中丞持節充入蕃答請和好使尋貶賈爲撫州責  
其逗留不行也以邵同代之至其年十二月靈武奏吐  
蕃大軍營於黃河北煙塵數十里鳳翔進吐蕃表函一  
封西川奏吐蕃入雅州界時方鎮鄰接蕃界者皆奉詔  
備禦東川節度使王涯上言臣道當出軍徑入賊腹有  
兩路一路從龍州青川鎮入吐蕃界直抵故松州城是  
吐蕃舊置節度之所一路從緜州威蕃柵入蕃界直抵  
栖雞城是吐蕃險要之地涯又陳備禦吐蕃要畧曰臣  
伏願陛下不愛金帛之費以釣北虜之心遣信臣與之

定約曰犬戎爲邊患者數矣能制而伏者惟有北蕃如能發而深入殺若干人取若干地則投若干之賞開懷以示之厚利以啗之一戰之後西戎亦衰矣

長慶元年四月遣尙綺力陀思來朝并獻國信其月吐蕃使郭居簡朝貢兼遣宰臣馬又遣使論納羅來請盟其年八月吐蕃請盟許之宰相欲重其事請告太廟太常禮院奏謹按肅宗代宗故事與吐蕃會盟並不告廟惟德宗建中末會盟於延平門欲重其誠信特令告廟至貞元三年會於平涼亦無告廟之文伏以事出一時

又非經制求之典故亦無其文今參詳不合告從之十月命宰相崔植等十四人與吐蕃使論納羅盟於郡城西王會寺十一月又遣使論答熟等來朝

二年五月又遣使論贊等來朝并進馬六十匹羊二百口及銀器玉帶等七月入蕃會盟使劉元鼎奏以五月六日與吐蕃盟於悶懼盧川是川蓋贊普之夏衙也中有臧河流焉滿川多紫薇樹其月吐蕃使論悉諾息等隨元鼎來謝十月命太僕少卿兼御史中丞杜載持節充答吐蕃謝會盟使

三年正月遣使論答熟來賀正朔并進羊六百口

四年遣使來求五臺山圖

寶曆元年三月遣尙綺立熱來朝且請和好

二年十一月詔遣光祿卿兼御史大夫李銳持節入蕃

充答和好使

太和五年正月遣使論乞熟來朝

六年又遣使論董勃藏來朝

九年正月遣使論籠熟來朝

開成元年遣使論悉立熟來朝正并獻國信及馬

二年遣使論監通來朝先是遣宗正少卿兼御史中丞李從簡入蕃其年五月至自蕃中進國信金銀器玉帶獾褐犛牛尾朝霞氎雜藥并馬牛橐駝等詔以其信物頒賜宰臣已下

四年遣使論焦熟等來朝

會昌二年贊普卒至十二月遣論贊熟等來告喪詔廢朝三日仍令文武常參官四品已上就鴻臚寺弔其使者詔遣將作少監兼御史中丞李璟持節入西蕃充弔祭使



三年正月璟至自吐蕃

大中三年春吐蕃宰相尙恐熱殺東道節度使以秦原安樂等三州并石門木峽等七關款塞涇原節度使康季榮以狀聞上命太僕卿陸耽往勞焉其年七月河隴耆老率長幼千餘人赴闕下上御延喜樓觀之莫不懽呼作舞更相解辯爭冠帶於康衢然後命善地以處之觀者咸稱萬歲八月勅曰自昔王之有國也何嘗不文以守成武以集事參諸二柄歸乎太寧朕猥荷丕圖思宏景業憂勤戒惕四載於茲每念河湟土疆縣互遐闊

自天寶末犬戎乘我多難無力禦姦遂縱腥羶不遠京邑事更十葉時近百年進士試能靡不竭其長策朝廷下議亦皆聽其直詞盡以不生邊事爲永圖且守舊地爲明理荏苒於是收復無由今者天地儲祥祖宗垂佑左衽輸款邊壘連降創業建功所謀必克寶賴樞衡妙算將帥雄俊副元元不爭之文絕漢武遠征之悔甌脫頓空於內地斥埃全據於新封莫大之休指期而就況將士等櫛風沐雨暴露郊原披荆棘而刁斗夜嚴逐豺狼而穹廬曉破動皆如意古無與京念此誠勤宜加寵

賞涇原宜賜絹六萬匹靈武五萬匹鳳翔邠寧四萬匹  
並以戶部產物充仍待季榮叔明玘君緒各領征師到  
本鎮度支差腳兩司各差人押領送至本道分付令充  
節級優賞四道牧州牧有功勞軍將各宜具名銜聞奏  
當議甄獎原州秦州威州并七關側近訪聞土地肥沃  
水草豐美如有百姓要墾闢耕種五年不加賦稅五年  
已後量定戶籍使任爲產業溫地有鹽頗聞厚利如置  
權稅可贍邊陲仍委度支計度制置聞奏四道長吏如  
能各於鎮守處遣官健營田度支支出牛糧種子每年量

得多少充軍糧亦不限約定數原州秦州威州并七關  
鎮守官健每人各給衣料兩分一分依常年例支給一  
分度支加給仍二年一度替換其家口委長吏切加安  
存官健有莊田戶籍者仰州縣放免雜差役秦州至隴  
州已來道路要置堡柵與秦州應接委李玘與劉臯卽  
便計度聞奏如商賈往來興販貨物任澤利潤一切聽  
從關鎮不得邀詰其官健父兄弟來往通傳家信不  
限多少任去如要墾闢種田依百姓例處分三州七關  
如要器仗長吏與量據所要申奏除反刺史關使後三

五月內差人巡檢有如修築部署課禎殊尤并訓練有度者其刺史關使雖新授官爵亦更與超昇其官健節級更與優賞山南西道劔南西川邊齊沒蕃州縣量力收復其兵士委本道差遣如要錢物接借亦具聞奏三州七關創置戍卒且要務靜如有羌戎潛來博易輒不得容受委刺史關使切加禁斷或有投降吐蕃到邊上收取本道令長史奏取進止其京城有犯事合流役囚徒從今已後一切配在十處收管嗚呼七關要害三郡膏腴候館之長址可尋唐人之遺風尙在遡懷往事良

用興嗟夫取不在廣貴保其金湯得必有時詎計於遲速今則便務修築不逞干戈必使足食足兵有備無患載洽亭育之道永致生靈之安遠邇臣僚宜體朕意咸通七年十月沙州節度使張義潮奏差迴鶻首領僕固俊與吐蕃大將尙恐熱交戰大敗蕃寇斬尙恐熱傳首京師

唐會要卷九十八  
迴紇在薛延陀北境居近婆陵水去京師六千九百里  
勝兵五萬人口十萬先屬於突厥初有特健俟斤死有  
子曰菩薩部落以為賢而立之由是大振菩薩勁勇有  
膽氣善籌策常以少制眾其母烏羅渾主知爭訟之事  
平反嚴明其地沙鹵有大羊而足長五寸貞觀二十一  
年正月率眾內附

唐會要卷九十八

迴紇

宋

溥

撰

迴紇在薛延陀北境居近婆陵水去京師六千九百里  
勝兵五萬人口十萬先屬於突厥初有特健俟斤死有  
子曰菩薩部落以為賢而立之由是大振菩薩勁勇有  
膽氣善籌策常以少制眾其母烏羅渾主知爭訟之事  
平反嚴明其地沙鹵有大羊而足長五寸貞觀二十一  
年正月率眾內附

顯慶三年十二月以迴紇故燭龍州刺史吐迷度子婆  
閏授左衛大將軍

龍朔三年二月移燕然都護府於迴紇部落仍改名瀚  
海都護府其瀚海都護府移雲中古城改名雲中都護  
府仍以磧爲界磧以北諸州爲蕃州悉隸瀚海磧南並  
隸雲中婆閏卒子比來栗代立比來栗卒子獨解支立  
其都督親屬及部落征戰有功者並自磧北移居甘州  
界故天寶末取驍壯以充赤水軍騎士在磧北者自則  
天後並爲默啜所役屬仍別立都督以統之獨解支卒

子伏帝匍立爲河西經略副使兼赤水軍使

開元七年伏帝匍卒贈特進遣使弔祭子承宗立承宗  
爲涼州都督王君奭誣奏長流瀼州而死其部落猶存  
天寶初迴紇葉護逸標苾襲滅突厥小殺之孫烏蘇米  
施可汗未幾自立爲九姓可汗由是至今兼九姓之號  
因而南徙居突厥舊地依烏德健山盟昆河居焉雖行  
逐水草大抵以北山比中國之長安城直南去西城一  
千七百里西城卽漢之高關塞北去磧口三百里有十一都督九  
姓部落一部落置一都督於本族中選有人望者爲之

唐書 卷九十八  
破拔悉密及葛邏祿皆收一部落各置都督一人每行  
止戰鬪以二客部落為鋒其九姓一曰迴紇二曰僕固  
三曰渾四曰拔曳固即拔野古五曰同羅六曰思結七曰契  
苾以上七姓部自國初以來著在史傳八曰阿布思九  
曰骨崙屋骨恐此二姓天寶後始與七姓齊列天寶三  
載三月朝廷以逸標苾有誅烏蘇米施功封為奉義王  
及破拔悉密自稱骨咄祿毗伽闕可汗又遣使朝貢四  
載加授特進五載冊為懷仁可汗六年逸標苾卒子磨  
延吸立國人號為葛勒可汗磨延吸勇悍善用兵十五

載迴紇吐蕃遣使請和親助國討逆葛勒可汗太子葉  
護以精騎三千隨朔方節度使郭子儀討賊方叔  
至德元年七月肅宗即位於靈武二載五月朔駕在彭  
原四月官軍為賊將安守忠所敗於清渠北乃遣中官  
竇議使於迴紇令發其兵九月迴紇遂遣太子葉護領  
蕃兵四千餘人來助討賊葉護入見肅宗親宴慰賜以  
金帛廣平王俶領朔方安西迴紇南蠻大食之眾十五  
萬討安慶緒既戰大敗逆賊遂收東京十一月迴紇至  
東京勅百官于長樂驛迎上御宣政殿引葉護宣慰其

餘酋長列于階下賜錦繡繪綵銀品物甚多葉護辭歸帝謂曰能爲國家就大事者卿力也何遽去耶葉護奏曰迴紇戰兵留在沙苑欲更爲陛下收范陽馬少不足以討除餘孽請且歸靈夏已北取馬用濟其事優詔答之仍許和親

乾元元年六月遣達亥阿波來迎公主拜開府儀同三司並獻馬五百匹貂裘白氍等又遣宰相帝德領驍將三千人助國討賊七月冊命葛勒可汗爲英武威遠毗伽可汗封幼女爲寧國公主以降焉八月遣三子骨吸

特勒來朝九月遣大首領蓋將軍等謝主下降又遣三婦人來謝二年四月英武威遠毘伽可汗卒長子葉護先被害少子移地健立是爲牟羽可汗寶應元年四月迴紇演者裴羅等十八人來朝八月可汗自將精騎五千南踰太原晉絳屯兵于陝州平陸縣遣使奏請助王師討平殘寇是日引其使宴於延英殿賜物有差命左散騎常侍兼御史大夫尙衡使於迴紇軍宣慰可汗遣弟右殺領精騎三千與行營節度使僕固懷恩破逆賊史朝義于北邙山二年正月可汗辭還

蕃六月冊命爲頡咄登里骨啜密施合俱錄英義建功  
毘伽可汗

大曆十三年正月迴紇寇太原河東節度留後鮑防出  
師與迴紇戰於陽曲我師敗績死萬餘人三月河陽將  
士劫迴紇輜重因大掠河陽坊市迴紇格戰死數千人  
十四年英義建功可汗爲其下所殺

建中元年六月冊迴紇合骨咄祿毘伽可汗爲武義成  
功可汗命京兆尹源休持節冊立初德宗遣中官梁文  
秀告哀於迴紇且修舊好可汗移地健不爲禮而九姓

胡素屬於迴紇者又陳中國便利以誘其心其相頓莫  
賀達干諫不聽因人怒擊殺之并殺其親信及九姓胡  
所誘來者凡三千人頓莫自立號爲合骨咄祿毗伽可  
汗使其酋長聿達于隨文秀來朝故命休冊拜焉

二年六月以兼光祿卿李涵爲散騎常侍充弔冊迴紇  
使

貞元三年八月迴紇使合闕將軍歸蕃初合闕將虜命  
請婚於我許以咸安公主嫁之命公主見合闕于麟德  
殿又令中謁者齋公主畫圖賜之可汗四年十一月迴



紇公主及使至自本藩德宗御延喜門以觀之可汗喜于和親其禮甚恭乃言曰子婿半子也父患于西戎子也當遣兵除之又罵辱吐蕃使乃使其宰相等率眾千餘人及妹吐骨祿毗伽公主姨迷叔咄祿公主及職使大首領等妻妾凡五十六婦人來迎可敦聘馬三千匹勅令朔州及太原分留迴紇七百餘人其宰相大首領等至者館于鴻臚寺召迴紇公主及使者對于麟德殿頒賜有差詔以咸安公主出降迴紇可汗仍特置府官屬並同親王府十一月冊令骨咄祿武義成功可汗爲

天親可汗

五年七月公主至衙帳迴紇使李義進請因咸安公主下降改紇字爲鶻字蓋欲誇國俗俊健如鶻也德宗允其奏自是改爲迴鶻其年九月天親可汗卒子多邏斯立國人謂之判官特勒詔冊爲登里邏沒密施俱錄忠貞毗伽可汗以鴻臚卿兼御史中丞郭鋒爲弔冊迴鶻使至六年四月忠貞可汗卒子阿啜立十月郭鋒至自迴鶻初鋒奉使冊忠貞可汗是歲忠貞爲弟所殺而篡立時迴鶻大將頡于迦斯西擊吐蕃未迴及四月其次

相率國人殺篡者而立忠貞之子爲可汗方年十七歲及六月頡于迦斯西討迴將至牙帳次相等懼其復有廢立不欲漢使知之留鋒數月而迴及頡于迦斯之至也可汗等迎于郊野盛陳鋒所送國信器幣可汗與次相等皆俯伏自言廢立之由且請命曰今日惟大臣生死之悉以所陳器幣贈頡于迦斯以悅之可汗又拜泣曰兒愚幼無知今幸得立惟仰食阿爹國政悉不敢聞也迴鶻謂父曰阿爹七年二月詔冊阿啜爲奉誠可汗遣鴻臚少卿御史大夫庾鈺持節弔祭冊命之四月迴

鶻遣使律支達于等來朝且告小窰國之喪

小窰國榮王琬之女

窰國將有行肅宗念其遠去故遣媵之及歸窰遂留虜中國人號爲小窰國公主也

九月敗吐蕃

于北庭使獻捷十年四月奉誠可汗卒奉誠無子國人立其相骨咄祿將軍詔冊冊爲滕里邏羽祿沒密施合祿胡毗伽懷信可汗五月令秘書少監兼御史中丞史館修撰張薦持節弔祭冊立之其骨咄祿將軍本姓跌跌少孤爲迴鶻大首領所養及長有武藝辯慧自天親可汗時已掌兵馬衙官諸大首領多敬服之奉誠無嗣國因奉爲王其天親以上諸可汗有子見幼小者並送

闕庭至德後迴鶻于中原有功故懷信可汗不敢言奉誠從人望也

永貞元年懷信可汗卒使來告喪十一月奉冊命可汗

為愛登里邏羽德密施俱錄毘伽可汗未詳愛登里邏與懷信何親史

並不以鴻臚少卿兼御史中丞孫杲持節充弔祭冊立

使至元和元年二月凡三朝貢三年二月迴鶻使來告

咸安大長公主之喪廢朝三日公主德宗第八女也本

降天親可汗卒子忠貞可汗立忠貞可汗卒子奉誠可

汗立奉誠可汗卒國人立其相是為懷信可汗皆從胡

法繼尚公主在蕃凡二十一年卒冊贈燕國大長公主

賜諡曰襄穆三月御麟德殿對迴鶻使多覽將軍等賜

白綵錦衣服銀器有差自迴鶻請修蕃臣之禮五年後

累遣使朝貢六年迴鶻可汗卒遣使掘野居葛勒將軍

來告喪七年正月冊命可汗為軍登里邏骨德密施合

毘伽可汗命檢校工部尚書鴻臚卿兼御史大夫張茂

宣持節弔祭冊立之八年四月迴鶻請和親伊珠難還

蕃宴于三殿贈銀器繪帛九年僕固昌來朝十一年正

月御麟德殿引對迴鶻使賜錦綵銀器有差三月又遣

使押進橐駝九頭馬八十四一年迴鶻可汗卒遣使來告喪十一月冊迴鶻可汗爲愛登里邏骨沒密施合毗保義可汗命宗正少卿兼御史中丞李孝誠持節弔祭冊立之十五年三月御麟德殿引見迴鶻使合達于等許其尙主其月封第九妹爲永安長公主降嫁迴鶻可汗

長慶元年三月保義可汗卒輟朝三日四月冊迴鶻可汗爲君登里邏羽祿密施勾主祿毗伽崇德可汗五月迴鶻宰相都督公主麾尼等至迎所降公主也初保義可汗求婚許降以永安公主保義旣卒則宜改定而酋人固請永安尋以第五妹封太和公主出降迴鶻命中書舍人王起就鴻臚寺宣諭焉上御麟德殿對迴鶻使及公主五十人等賜錦繒銀器有差六月勅太和公主宜特置府命宰相杜元穎充五禮使迴鶻宰相并公主獻駝褐白錦白練貂鼠裘鴨頭子玉腰帶等馬一千匹駝五十頭至七月冊太和公主爲仁孝端麗明智上壽可敦命左金吾衛大將軍兼御史大夫胡証爲送公主及冊可汗使光祿卿兼御史大夫李憲爲之副三年崇

德可汗卒其從父弟曷薩可汗立遣使來告喪冊曷薩可汗爲愛登里囉汨沒密施合毗伽昭禮可汗命工部尙書兼御史大夫鄭權弔祭冊立之寶厯中頻使朝貢至太和六年爲其下所殺其從子胡特勒立遣使告喪爲之廢朝詔冊胡特勒爲愛登里囉汨沒密施合毗伽彰信可汗命左驍衛將軍兼御史大夫唐宏實持節弔祭冊立之

開成四年其相掘羅勿薦公引山北沙陀攻圍之可汗自殺國人立勿薦公爲廬颯可汗未受冊命連年饑疫羊馬死者被地又大雪爲災武宗卽位遣嗣澤王溶告喪始知曷代其年爲黠戛斯所害其國分散有烏介特勒者曷薩之弟胡特勒之叔也亦率眾南奔至錯子山乃自立爲可汗居塞上朝廷遣鴻臚卿張賈右金吾將軍王會往宣諭分邊備以振食之兼就大同川還其馬價絹且冊爲可汗遣將作少監兼御史中丞苗鎮持節駐于河東待其底定然後受之而可汗違背恩德侵劫諸部落旋又擅入雲州將入振武上以爲天亾數盡不可容也乃命河東等遣兵討之

會昌三年正月諸軍大破迴鶻於殺湖山就虜帳中奉  
太和公主歸於我軍其特勒以下大眾數萬人盡降獲  
其前後所賜勅書可汗亦被瘡與百騎踰山遁走捷書  
至宰相率百僚閣中稱賀先是迴鶻宰相嗚沒斯特勒  
將其家屬及麾下數千人來降上嘉之降書撫納仍賜  
姓李氏封懷化郡王改名思忠賜甲第於永樂坊并家  
屬遣所在給傳赴闕其軍士分于諸鎮收管用壯騎兵

西爨

西爨者南寧之渠帥自云本河東安邑人七世祖事晉

爲南寧州太守屬中國亂遂王蠻夷梁元帝時南寧州  
刺史徐文盛徵詣荆州有爨瓚者遂據南寧之地延袤  
二千餘里俗多華人旣死其子震翫統其眾高祖受禪  
拜翫子宏達昆州刺史令持其父屍歸葬本鄉益州刺  
史段綸又遣俞大施至南寧諭之由是部落歸款武德  
七年七月二十四日來貢方物

昆彌國

昆彌國者一曰昆明西南夷也以爨之西洱河爲界卽  
葉榆河也其俗與突厥略同去京師九千里勝兵數萬

人相傳云與匈奴本是兄弟國也漢武帝得其地入益州郡部其後復絕諸葛亮定南中亦所不至武德四年雋州治中吉宏偉使南寧因至其國諭之至十二月遣使朝貢因求內附自是每歲不絕其使多由黔南路而至近又封其別帥為滇王世襲其國貞觀十九年四月二十日右武侯將軍梁建方討蠻降其諸屯七十二所戶十萬九千三百遣使往西洱河有數十百部落大者五六百戶小者二三百戶無大君長有數十姓以楊李趙董為名家各擅一州不相統攝自云其先本漢人有

城郭村邑自夜郎滇池以西皆云莊躋之餘種也其土五穀與中夏同以十二月為歲首

林邑國

林邑漢日南象郡之地其先因漢女子徵則之亂縣功曹子區連殺縣令自號為王子孫相承後王無子其甥范熊代立晉宋已來恆通中國其地恆溫不識冰雪常多霧雨人能用弩以藤為甲王出則列象千頭信佛法以二月為歲首稻歲再熟有結遼鳥能解人語亦謂之蓋夷音訛也

武德六年二月其王范梵志遣使朝貢至貞觀四年又  
 貢火珠大如雞卵圓白皎潔狀若水晶正午向日以艾  
 承之即火燃五年又獻白鸚鵡精識辨慧善於應答太  
 宗憫之並付其使令放歸林藪十四年其國獻通天犀  
 一十枚諸寶稱是永徽總章中其王鉢迦含波摩累獻  
 馴象先天開元中其王建多達摩又獻馴象沈香琥珀  
 等

天寶八載其王盧陀羅使獻真珠一百條沈香三十觔  
 鮮白氍馴象二十隻自至德後遂改稱環王國不以林  
 邑為號貞元九年環王因遣使貢犀牛上令見於太廟  
 元和四年八月安南都護張舟奏破環王國偽驩愛州  
 都督殺三萬餘人獲其王子五十九人器械戰船戰象  
 稱之

咸通二年十二月寇安南府遣神策將軍康承訓率禁  
 軍并江西湖南之兵赴援先是大中末安南都護李琢  
 貪暴侵刻獠民羣獠引蠻攻  
 安南至咸通三年大徵兵赴援  
 天下騷動其年東蠻竟陷交趾

真臘國

真臘在林邑之西南本扶南之屬國也南接車渠西接



朱江國其王姓利利氏其俗東向開門國以東爲上有戰象五千頭梁大同中始并扶南而有其國都伊奢那城風俗與林邑同

武德六年十月遣使來朝

貞觀二年十一月又與林邑國俱來朝貢太宗嘉之賜賚甚厚今南方人謂真臘國爲吉蔑國自神龍已後真臘分爲二半以南近海多陂澤處今謂之水真臘半以北多山阜處今謂之陸真臘亦謂之文單國貞觀中累遣使朝貢永徽二年遣使獻馴象

聖歷元年開元五年天寶九年並遣使朝貢并獻犀牛水真臘國者其境東西南北約皆八百里東至奔陀浪洲西至墮羅鉢底國南至小海北至陸真臘國其王所處城號娑羅提拔城國之東有小城皆謂之國其國甚多象餘所出物產及言語與真臘同

元和八年遣使李摩那等來朝

白狗羌

白狗羌西羌之別名與會州連接勝兵一千白蘭羌亦西羌之別種風俗並與黨項國同

武德六年十二月遣使朝貢

貞觀五年十二月其渠帥並來朝

永徽二年十一月特浪生羌卜樓莫各率眾萬餘戶詣茂州歸附其年正月生羌六首領凍就率部落內附以其地置建州顯慶中白蘭爲吐蕃所併收其兵以爲軍

鋒

開元二十九年益州長史章仇兼瓊發其國及索摩等諸州籠官三百餘出至奉川望準女國等例簡擇許令入奏餘並就奉川宴賞放還從之其年十月白狗國四

品籠官蘇唐封及狗十川五品籠官薛阿封管至各賜紫金及帛以遣之

貞元九年七月其王羅陀忽逋租又與女國等詣劍南西川節度使韋臯內附謁授試太常卿兼保州司馬至今子孫承襲其爵

曹國

曹國居埋郵密水南古康居之地俗與康國同附于突厥勝兵千餘人好淫祠罄資產而無悔去瓜州六千里武德七年七月朝貢使至云本國以臣爲健兒聞秦王

神武願在麾下高祖大悅

貞觀十一年至開元中朝貢不闕

天寶元年其王哥邏僕羅使獻方物三載詔封其王爲懷德王四載哥邏僕羅上表自陳曾祖以來奉向天可汗忠赤常受徵發望乞恩慈將奴土國同於唐國小子所須驅遣奴身一心爲國征討十一載其王設阿忽與國副王野解及九國王並上表請同心擊黑衣大食元宗宴賜慰諭遣之又有中曹國在西曹國之東康國之北其所治謂之迦布底真城在平川其人長大工於戰

鬪又有西曹國治邯密水南瑟底痕城東南去康國一百里西北至何國二百里南與史國界接北與波覽國界接其城東北四十里有越於底城內有得悉神遠近敬信之有金人金頗羅闊一丈五尺每日所祭羊馬千人食之不盡并有金銀器胡書題云漢天子所賜神器隋大業中始通武德以後常修蕃禮

殊柰國

殊柰崑崙人也在林邑南去交趾海行三月餘日習俗文字與婆羅門同絕遠未嘗朝中國貞觀二年十月使

至朝貢

拔野古國

拔野古在僕骨東境勝兵一萬口六萬人皆殷富其地東北一千里曰康干河有松木入水一二年而化爲石其色青有國人居住其人謂之康干石人皆著木腳冰上逐鹿其國東北六日行至鞠國有樹無草無羊馬有鹿如中國牛馬使鹿牽車可勝三四人衣鹿皮鹿食地苔自鞠國東行十五日並俞折國土地廣大百姓多風俗與拔野古同少牛馬地多豹鼠骨吐鞠國北有大漢

國饒羊馬其人極長大長者至丈三四尺其國云北有骨帥國與大漢國相接戶萬五千勝兵三萬

霫斃國

霫斃匈奴之別種居鮮卑故地亦與靺鞨爲鄰勝兵萬人並臣於頡利習俗與突厥略同其渠帥號爲俟斤貞觀三年朝貢至二十一年列其地爲賓顏州卽以其酋長爲刺史先是太宗蕩平突厥其番望多授以侍衛之官沙漠之人素愛錦罽太宗旣招來遐域特賜其好者用文錦析用舊縷而錯綜其色花葉翔走事多殊形

每頒賜其酋長大為榮寵

顯慶五年以其首領李含珠為居延都督含珠死以其弟厥都為居延都督自後無聞焉

黨項羌

黨項在古析支之地漢西羌之別種魏晉已降西羌微弱自周滅宕昌鄧至之後黨項始強南雜春桑迷桑等羌北連吐谷渾其種每姓別自為部落一姓之中復分為小部落大者萬餘騎小者數千騎不相統一有細封氏費聽氏往利氏頗超氏野辭氏旁當氏米擒氏拓拔

氏最為強族俗皆土著有棟宇織犛牛及羊毛覆之俗尚武無法令賦役其人多壽年至百五六十歲不事生產好為竊盜互相凌劫尤重復讎若讎人未得必蓬頭垢面洗足蔬食要斬讎人而後復故常男女並皆衣裘褐仍被大氈不知耕稼土無五穀氣候多風寒以犛牛馬騾羊豕為食五月草始生八月霜雪降求大麥于他界醞以為酒妻其庶母及伯叔母嫂子弟之婦淫穢蒸報諸夷中最為甚然不婚同姓老死者以為盡天年親戚不哭少死者則云天枉而悲哭之死則焚屍名為火

唐會要 卷九十八  
葬無文字但俟草木以記歲時

貞觀三年南會州都督鄭元璠遣招諭其長細封步賴舉部內附亦自入朝列其地爲軌州拜步賴爲刺史其後諸部相次內附列其地爲岷奉巖遠四州各拜首領爲刺史五年詔遣使開其河曲地爲六十州內附者三十四萬口有羌酋拓拔赤詞者甚爲渾主伏允所暱與之結婚屢抗官軍後與其從子思頭並率眾與諸首領歸款列其地爲懿嗟麟可等三十二州以松州爲都督府羈縻存撫之拜赤詞爲西戎州都督賜姓李氏自是

從河首大磧石山已東並爲中國之境後吐蕃強盛拓拔氏漸爲所逼遂請內徙始移部落于慶州因置靜邊等州以處之故地陷于吐蕃其處者爲其役屬吐蕃謂之弭藥又有黑黨項在赤水之西李靖之西討也渾主乞伏允奔之處以空閑之地及吐谷渾國舉國內屬其黑黨項首領號敦善王因貢方物其雪山黨項姓破丑氏居雪山之下貞觀初亦常朝貢又有白狗舂桑白蘭等諸羌自龍朔以後並爲吐蕃所破而服屬焉其在西北邊者天授三年內附凡二十萬口分其地置朝吳浮

唐書卷一百九十五  
歸等十州仍散居靈夏等界內自至德已後常爲吐蕃所誘密以官告授之使爲偵導故時或侵叛尋亦底寧至寶應初其首領來朝請助國供靈川軍糧優詔贊美其在涇隴州界者至後上元元年率其眾十餘萬詣鳳翔節度使崔光遠請降

寶應元年十二月其歸順州部落乾封州部落歸義州部落順化州部落和寧州部落和義州部落寶善州部落寧定州部落羅云州部落朝鳳州部落並詣山南西道都防禦使梁州刺史臧希讓請冊印希讓以聞詔從

之

貞元三年十二月初禁商估以口馬器械于黨項部落貨易十二年二月六州黨項自石州奔過河西黨項有六府部落曰野利越詩野利龍兒野利厥律兒黃野海野宰等居慶州者號爲東山部落居夏州者號爲夏平部落永泰大厯以後居石州依水草至是永安城鎮將阿史那思昧擾其部落求取駝馬無厭中使又贊成其事黨項不堪其弊遂率部落奔過河

元和元年七月宰相杜佑上疏曰伏見近者黨項與西

戎潛通屢有降人指陳事蹟而公卿廷議以爲宜當謹兵備戒戎軼益發甲卒邀其寇暴此蓋未達事機匹夫之常論耳夫蠻夷猾夏唐虞已然周宣中興獫狁爲害但命南仲往城朔方驅之太原及是而止誠不欲弊中國怒遠夷也秦平六國恃其兵力北築長城以拒匈奴西逐諸羌出於塞外勞力擾人結怨階亂中國未靜賊徒競起海內雲擾實生謫戍漢武因文景之富命將興師遂至戶口減半竟下哀痛之詔罷田輪臺前史書之爲嘉其先迷而後復蓋聖王之治天下也惟務綏靜蒸

民故西至流沙東漸於海在南與北示存聲教不以遠物爲珍重求遐方入貢蓋疲內而事外終得少而失多故前代納忠之臣並有諫君之議淮南王請息師于閩越賈捐之願棄地於珠崖安危利害高懸前史昔馮奉世矯漢帝之詔擊莎車傳其王首于京師威振西域宣帝大悅議加爵土之賞蕭望之獨以爲矯制違命雖有功效不可爲法恐後之奉使者遂爭發兵爲國家生事述理明白其言遂行國家自天后以來突厥默啜兵強氣勇屢寇邊城爲害頗甚開元初邊將郝靈荃親捕斬



之傳首闕下自以爲功世莫有二自望寵爵宋璟爲相  
慮武臣邀功爲國生事止授以郎將由是訖開元間無  
人復議開邊中國遂寧外夷亦靜此皆成敗可徵鑒誠  
非遠其黨項小蕃雖處中國本懷我德當示撫綏間者  
邊將非廉亟有侵刻或利其善馬或取其子女使賄其  
方物徵爲役徒怨苦旣多叛亾遂起或與北狄通使或  
與西戎連寇有爲使然固當懲革傳曰遠人不服則修  
文德以來之管子曰國家無使勇猛爲邊境此誠聖哲  
識微知著之遠略也今戎醜方強邊備未實誠慎擇良

將誠之完葺使知誠信絕其求取用示懷柔來則懲禦  
去則謹備自然彼懷我德革其奸謀何必遽圖興師坐  
致勞費陛下上聖至仁覆育羣類動必師古謀無不臧  
伏望堅保永圖置兵衽席實天下幸甚止深嘉納之  
九年五月復置宥州以護黨項

十五年七月鹽州送劫烏白池鹽女子拓拔三娘并婢  
二人詔入內詰之赦罪送本州其年十一月命太子中  
允李寮爲宣撫黨項使以部落繁富至今遠近商賈齎  
雜繒諸貨入其部落買其牛馬至太和開成之際其蕃

鎮統領無緒恣其貪恠不顧危亾或強市其羊馬者不時償其直以是部落苦之遂相率爲盜靈鹽之路小梗會昌初上頻命使安撫之兼命憲臣爲使分三印以統之在邠寧鄜延者以侍御史內供奉崔君會統之在鹽夏長澤者以侍御史內供奉李樗主之在靈武麟勝者以侍御史內供奉鄭賀主之仍各賜緋以重其事久而無狀尋皆罷之大中四年內掠邠寧詔鳳翔李業河東李拭討之羌乃破殄

唐會要卷九十九

宋

王

溥

撰

東謝蠻

東謝蠻在黔州之西數百里南接守宮獠西連夷子北至白蠻土宜五穀無文字刻木爲契散在山谷依樹爲居無稅賦之事皆自爲生業刀劍不離身男女椎髻以緋束之後垂向下其首領謝元深世爲酋長謝氏一族法不育女自云高姓不可下嫁也

貞觀三年元深入朝冠烏熊皮冠若今之旄頭以金絡

額身披毛帔韋皮行膝而著履中書侍郎顏師古奏言昔武王時天下太平遠國歸款周史書其事為王會篇今萬國來朝至以其地如此輩章服實可圖寫今請撰為王會圖從之為應州拜元深刺史隸黔州都督府又有南謝首領謝強與西謝蠻連接其元深俱來朝拜為南壽州刺史後改為莊州

貞元十三年正月西南蕃大酋長正議大夫檢校蠻州長史繼襲蠻州刺史貴陽郡開國公賜紫金魚袋宋鼎左右大首領朝散大夫前檢校邛州刺史賜紫金魚袋謝汕左右大首領繼襲攝蠻州巴江縣令借紫金魚袋

宋萬傳界首子弟大首領朝散大夫牂州錄事參軍謝文經黔中經畧招討觀察使王礎奏前件刺史建中三年一度朝賀自後更不許隨例入朝今年懇訴稱州接牂牁同被聲教獨此排擯竊自慚恥謹遣隨牂牁等朝賀伏乞特賜優諭兼同牂牁刺史授官其牂牁兩州戶口殷盛人力強大鄰側諸蕃悉皆敬憚請比兩州每年一度朝賀仍依牂牁輪環差定并以才幹位望為眾所推者充勅旨宋鼎等已改官訖餘依奏

西趙蠻

西趙蠻在東謝之南其界東至夷子西至昆明南至西  
洱河山洞深阻莫知里數南北十八日行東西二十三  
日行其風俗物產與東謝同趙氏世爲酋長有萬餘戶  
貞觀三年遣使入朝二十一年以其地爲明州以首  
領趙摩爲刺史

牂牁蠻

牂牁蠻亦姓謝氏其地北距兗州東至辰州南至交州  
西至昆明土氣鬱熱稻粟再熟無徭役刻木爲契風俗  
與東謝同貞觀二年首領謝龍羽遣使朝貢授牂牁州

刺史封夜郎郡公四年十二月遣使朝貢

開元十年閏五月大酋長謝元齊死詔立其嫡孫嘉藝  
襲其官封至二十五年其大酋長趙君道來朝正獻方  
物大曆中每歲遣使朝貢及貞元初朝獻不絕至七年  
二月授其酋長趙王俗官以其歲初朝貢不絕褒之也  
自七年後至十八年凡五遣使來朝貢

元和三年五月勅自今以後委黔南觀察使差本道軍  
將充押領牂牁昆明等使至四年正月又遣使來朝是  
月遣中使魏德和領其使并齎國信物赴牂牁國仍降

璽書賜其王焉七年十二月遣使朝貢九年復遣使謝  
注二十人朝貢十一年正月遣使來朝拜其酋長等官  
仍賜告身一十六通遣還十二月又遣使二十五人賀  
正召對於三殿仍賜宴及銀器錦綵等長慶中朝貢不  
絕凡外夷使將至遣中使郊驛迎勞既至恩禮甚厚將  
歸亦送之以懷遠人今悉不書省文也

寶曆元年十二月遣使謝良震來朝自太和五年至會  
昌二年凡七遣使朝貢并賀正皆寵以宴賜

南平蠻

南平蠻者東與智州南與渝州西南州北涪州接部落  
四千餘戶山有毒草沙蝨及蝮蛇人並樓居登梯而上  
號爲干欄其人美髮爲椎髻土多女少男爲婚法女氏  
必先貨求男族貧人無以嫁女多賣與富人爲婢俗皆  
婦人執役其王姓朱氏號爲劔荔王  
貞觀三年遣使內附以其地隸渝州

南詔蠻

南詔蠻本烏蠻之別種也姓蒙氏蠻謂王爲詔其先有  
六詔各有君長蒙舍龍世長蒙舍州高宗時細奴邏來

唐會要 卷九十九  
朝開元二十六年封其子皮羅閣越國公賜名歸義其  
後以破西洱蠻功勅授雲南王歸義漸強五詔浸弱劍  
南節度使王昱受其賂進六詔爲南詔歸義日以驕大  
每人覲朝廷亦加禮天寶七載歸義卒其子閣羅鳳立  
與節度使鮮于仲通不相得雲南太守張虔陀復私其  
妻九載因發兵反鮮于仲通爲南詔所敗自是南詔北  
臣吐蕃十二載復徵天下兵俾李宓將之復敗於太和  
寇陷嵩州及會同軍  
大曆十四年十月吐蕃率南蠻眾十萬眾來寇一入茂

州過汶川及灌口一入扶文掠方維白渠一入黎雅過  
邛邛連陷郡邑乃發禁兵四千人及幽州兵馬五千人  
同討大破之

貞元十年三月劍南節度使韋皋奏雲南蠻王異牟尋  
領部落兵馬破吐蕃并收鐵橋以來城壘一十六擒吐  
蕃王五人歸降百姓一十二萬人約計三萬餘戶大小  
城一十六所勅旨宣付所司其年七月詔賜南蠻異牟  
尋鑄印一用黃金銀爲窠其文曰貞元冊南詔印先是  
劍南西川節度使韋皋奏南詔前遣清平官尹仇寬獻

唐會要 卷九十九  
所授吐蕃印五二用黃金今賜印請以黃金從蠻夷所  
重從之九月南詔又使蒙湊羅棟及清平官尹仇寬來  
獻鐸槃浪人劍及吐蕃印八蒙湊羅棟異牟尋之弟也  
既朝見於麟德殿上所賜賚甚厚其年十月以南詔朝  
貢使尹仇寬爲檢校左散騎常侍其餘授官各有差至  
十一年九月南詔異牟尋獻馬六十匹至十二年韋皋  
奏於雅州會野路招受得投降蠻首領高萬唐等六十  
九人蠻約七千戶二萬口其萬唐等先授吐蕃金字告  
身五十片至十四年十二月南詔異牟尋遣酋望大將

軍王邱等各賀正兼獻方物至十九年春正月癸丑朔  
上御含元殿受南詔朝賀使楊鎮龍武試太僕少卿兼  
御史授黎州廓清道蠻酋領龔恭化郡王劉志寧復試  
太常卿

永貞元年南詔遣使趙迦寬來赴德宗山陵

元和二年八月授南詔使者鄧傍傳試殿中監其年十  
二月復遣使朝賀三年十一月以南詔異牟尋卒廢朝  
三日辛未以諫議大夫段平仲兼御史中丞持節充冊  
立南詔及弔祭使仍命鑄元和冊南詔印司封員外郎

李逢吉副之至四年正月以太常卿武少儀兼御史中丞充冊立及弔祭使先是諫議大夫段平仲充使朝廷以爲諫官不合離闕因罷平仲使少儀遂有是行冊異牟尋之子驃信笄蒙閣勸爲南詔王七年十二月南詔遣使朝貢十年十一月南詔蠻使楊還奇等二十九人來朝至十三年四月劍南西川節度使奏南詔請貢獻助軍牛羊奴婢等上發詔褒之不令進獻

太和三年宰臣杜元穎鎮守西川以文儒自高不練戎事南蠻乘我無備入寇黎州牧屢陳皆不信之十月黎州陷十一月犯我西川驅劫玉帛子女而去卽日鄰境以狀聞上大怒貶元穎爲韶州刺史丁卯又貶爲循州司馬命東州節度使郭釗代焉明年春正月其王蒙嵯頭以表自陳請罪兼疏元穎過失國家方事柔遠尋宥其過自後賦貢不絕

開成四年正月上御龍德殿入對朝賀正南詔酋趙莫三十七人賜官告并金綵銀器金銀帶衣服等有差至五年十二月上御三殿對歸國南詔使等十六人會昌二年正月三殿對還蕃南詔酋望張元佐等二十



五人大中八年二月南蠻遣使進犀牛詔還之  
咸通十年十一月南蠻驃信坦綽酋龍率眾二萬寇嵩  
州定邊軍節度都頭安再榮守清溪關爲賊所攻再榮  
退保大渡河北去清溪關二百里隔水相射凡九日八  
夜定邊軍節度使竇滂勒兵拒之十二月驃信遣清平  
官十餘人來僞和與竇滂語次蠻軍船筏競渡忠武武  
蠻兵士結陣抗之接戰自午及申蠻軍稍卻竇滂懼將  
自縊於帳中徐州將苗全緒止之滂乃宵遁全緒乃夜  
入蠻軍萬弩亂發蠻眾大駭全緒等保軍而還蠻軍乘

勝進攻西川朝廷以顏慶復駐大渡河制劔南應接等  
使宋威將兵數萬與忠武武寧之軍合勢戰於漢州之  
毗橋大捷蠻軍走解西川之圍

乾符元年十二月南蠻復寇西蜀詔河東河西山南西  
道東川徵兵赴援西川節度使高駢奏西川新舊軍差  
已眾况蠻蠻小醜必易枝梧今已道路崎嶇館驛窮困  
更有軍頓立見流移其左神策長武鎮鄜州河東所抽  
兵中人數不少况備辦軍食費損尤多又緣三道藩鎮  
盡扼羌戎邊鄙未寧望不差發詔除河東兵士令竇瀚

唐會要 卷九十九  
不要差發外餘三處兵士委高駢到日分布驅使三年十一月邕州節度使辛讜奏南詔遣使段瑳寶等四人通和詔令答使許之至五年七月讜遣從事徐雲叟通和凡水陸四十七程至善闡府遇驃信華言君上也遊獵尙去雲南一十六程敘好而還進南詔錄三卷

東女國

東女西羌之別種以西海中有女國故稱東女國也俗以女爲王東與茂州黨項接界隔羅女蠻及白狼夷有八十餘城王所居名康延川中有弱水南流用牛皮爲船以渡戶口四

萬女王號爲賓就有女官號曰高霸評議國事在外官寮並男夫爲之五日一聽政女王若死國中多斂錢動至數萬更於王族求令女二人而立之大者爲大王小者爲小王若大王死則小王立或姑死而婦繼無有篡奪其所居皆起重屋王至九層國人至六層其王服青毛綾裙下領衫上披青袍其袖委地冬則羔裘飾以紋錦爲小環髻飾之以金耳垂璫足履鞢鞞俗重婦人而輕丈夫文字同於天竺以十一月爲正每至十月令巫者齋酒殺詣山中散糟麥於空大咒呼鳥俄頃有鳥如

雉飛八巫者懷中因剖其腹視之有一穀來歲必登若有霜雪必多異災其俗信之名爲烏卜武德中女王湯滂氏遣使貢方物

永徽七年正月其國遣女使高霸黎文并其主男三盧等來朝

垂拱五年其王斂臂遣大臣湯劔左來朝仍請官號則天拜斂臂爲左玉鈐衛員外將軍仍以瑞錦製蕃服賜之

天授三年其主俄衍兒爾來朝萬歲通天元年又遣使

來朝

開元二十九年十二月其王趙曳夫遣子獻方物

天寶元年五月命有司宴之於曲江令宰臣以下同宴又封曳夫爲歸昌王授左金吾衛大將軍賜其子帛八十匹放還後復以男子爲王

貞元九年其王湯立悉與哥鄰國王董臥庭白狗國王羅陀忽逋租國王弟鄧吉知南水王國王姪薛尙悉曩弱水國董辟和悉董國王湯悉贊清遠國王蘇唐磨咄霸國王董藐蓬各率其種落詣劔南四川內附其哥鄰

等國皆散居西山弱水王即國初女國之弱水部落其  
悉董國在弱水之西故亦謂之弱水西悉董王舊皆分  
隸邊郡祖父例授將軍中郎果毅等官自中原多故皆  
爲吐蕃所役屬其部落大者不過二三千各置縣令十  
數人理之土有絲絮歲輸於吐蕃至是立悉與之同盟  
相率獻款兼齎天寶中國家所賜封告共三十九通以  
進節度使韋皋處其眾於維霸保等州給以種糧耕牛  
咸樂生業立悉等數國王自來朝召見於麟德殿授立  
悉銀青光祿大夫歸化州刺史鄧吉知試大府少卿兼

丹州長史薛尙悉曩試少府少監兼霸州長史董臥庭  
行至緜州卒贈武德州刺史命其子利羅爲保寧都督  
府長史襲哥鄰國王立悉妹乞悉漫頗有才智從其兄  
來朝封和義郡夫人其大首領董臥卿等皆授以官俄  
又授女國王兄湯厥銀青光祿大夫試大府卿清遠王  
弟蘇歷顛銀青光祿大夫試衛尉卿南水國王薛莫庭  
及湯悉贊董藐蓬女國唱後湯佛庭美玉鉢南郎唐並  
授銀青光祿大夫試太僕卿其年西山松州生羌等二  
萬餘戶相率內附其黏信部落主董夢葱龍諾部落主

董辟忽皆授試衛尉卿立悉等並赴明年元會訖賜以金帛各遣還八月詔加韋皋統押近界諸蠻及西山八國使其部落至今猶代襲刺史等官然亦潛通吐蕃故謂之兩面羌

婆利國

婆利者南荒之國也在林邑東南海行可萬里地延袤數千里暑熱恆如中國盛夏時穀一歲再熟王姓刹利邪伽名護路那婆世有其位人皆黑色穿耳附璫其王服花冠飾以真珠瓔珞身坐金牀行則駕象鳴鼓吹蠶

貞觀四年四月使至婆利界有羅刹國其人極陋朱髮黑身獸牙鷹爪時與林邑人作市市以夜而自掩其面其國出火珠狀如水晶日正午時以珠承影取艾承之卽火出其年林邑國來獻云羅刹得之或云出獅子國國在西南海中有稜伽山出奇寶人到初無所見但署寶物價值賣於洲上商舶依價貨之而去其國以能馴養獅子故以爲國名

倭國

古倭奴國也在新羅東南居大海之中世與中國通其

王姓阿每氏設官十二等俗有文字敬佛法椎髻無冠帶隋煬帝賜之衣冠今以錦綵爲冠飾衣服之制頗類新羅腰佩金花長八寸左右各數枚以明貴賤等級

貞觀十五年十一月使至太宗矜其路遠遣高表仁持

節撫之表仁浮海數月方至

白云路經地獄之門親見其上氣色蒼鬱又聞呼叫

錐鍛之聲甚可畏懼也

表仁無綬遠之才與王爭禮不宣朝命而

還由是復絕

永徽五年十二月遣使獻琥珀瑪瑙琥珀大如斗瑪瑙大如五升器高宗降書慰撫之仍云王國與新羅接近

新羅素爲高麗百濟所侵若有危急王宜遣兵救之倭國東海嶼中野人有耶古波耶多尼三國皆附庸於倭北限大海西北接百濟正北抵新羅南與越州相接頗有絲絲出瑪瑙有黃白二色其琥珀好者云海中湧出咸亨元年三月遣使賀平高麗爾後繼來朝貢則天時自言其國近日所出故號日本國蓋惡其名不雅而改之

大曆十二年遣大使朝楫寧副使總達來朝貢

開成四年正月遣使薛原朝常嗣等來朝貢

大羊同國

大羊同東接吐蕃西接小羊同北直于闐東西千里勝兵八九萬辮髮氍裘畜牧爲業地多風雪冰厚丈餘物產與吐蕃同無文字但刻木結繩而已酋豪死抉去其腦實以珠玉剖其五臟易以黃金鼻銀齒以人爲殉卜以吉辰藏諸巖穴他人莫知其所多殺犍牛羊馬以充祭其王姓姜葛有四大臣分掌國事自古未通中國貞觀五年十二月朝貢使至十五年聞中國威儀之盛乃遣使朝貢太宗嘉其遠來以禮答慰焉至貞觀末爲

吐蕃所滅分其部眾散至隙地

烏羅渾國

烏羅渾蓋後魏烏洛侯也今亦謂之烏羅護東與靺鞨南與契丹北與烏丸爲鄰風土與靺鞨同

貞觀六年朝貢使至

女國

女國在葱嶺之西以女爲王每居層樓侍女數百五日一聽政其王若死無女嗣位國人乃調斂金錢還於死王之族買女而立之其俗貴女子賤丈夫婦人爲吏男

子爲軍士女子貴者則多有侍男男子貴不得有侍女雖賤庶之女盡爲家長猶有數夫焉生子皆從母姓男子披髮以青綠塗面婦人辮髮而縈之土宜六畜多駿馬

貞觀八年十二月朝貢使至

石國

石國其俗善戰多良馬西北去瓜州六千里  
貞觀八年十二月朝貢使至

顯慶三年以其地噉羯城爲大宛都督府仍以其王職

土屯攝舍提于屈昭穆爲都督

開元初其蕃王莫賀咄吐屯有功封爲石國王加特進尋又冊爲順義王二十九年其王伊吐屯屈勒遣使上表曰奴自千代以來於國忠赤祇如突厥騎施可汗忠赤之中部落安貼後背天可汗腳底大起今突厥已屬天可汗在於西頭爲患惟有大食莫踰突厥伏乞天恩不棄突厥部落討得大食諸國自然安貼

天寶初累遣朝貢至五年封其王子那俱車鼻施爲懷化王并賜鐵券九載安西節度使高仙芝奏其王蕃禮



有虧請討之其王約降仙芝使部送去開遠門數十里負約以王爲俘獻於闕下斬之自後西域皆怨仙芝所擒王之子西走大食引其兵至怛羅斯城仙芝軍大爲所敗自是西附於大食至寶曆二年及大曆七年並遣使朝貢

吐火羅國

吐火羅在葱嶺之西數百里與挹怛雜居勝兵五萬其國土著多男子少婦人故兄弟通室婦人五夫則首戴五角十夫則首戴十角男子無兄弟則與他人結爲昆

季方始得妻不然則終身無婦矣被服文字與于闐畧同其城北有頗黎山南巖穴中有神馬國人每牧馬於其側產名駒汗血馬北界接西域大宛之地

貞觀九年五月朝貢使至

永徽元年獻大鳥高七尺其色元足如駝鼓翅而行日三百里能噉鐵夷俗謂之駝鳥三年其葉護那史烏涇波奉表告立高宗遣置州縣使王名遠到其國以所理阿緩大城爲月氏都督府仍分其小城爲二十四州以烏涇波爲都督五年烏涇波遣子伊室達官弩以朝獻

龍朔元年投烏涇波使持節月氏等二十五州諸軍事  
月氏都督

麟德二年遣其弟祖紇多獻瑪瑙燈樹兩具高三尺餘  
開元七年其葉護支汗那帝賒上表獻解支之人暮闡  
請加試驗八年獻名馬騶及異藥至十二年遣使獻胡  
藥乾陀婆羅等二百餘品十七年冊其首領骨咄祿頓  
達度爲葉護其年葉護遣使獻須那伽帝釋麥十八年  
遣使獻紅頰梨碧頰梨生馬腦金精及質汗等藥  
天寶八載其葉護失理忙伽羅遣上表曰臣鄰境有一

胡號曰羯師居在深山恃其險遠違背聖化親附吐蕃  
於國內置吐蕃城投勃律要路與吐蕃擬將兵入境臣  
每憂懼思破兇徒望請安西兵馬來載五月到小勃律  
六月到大勃律伏乞允臣所奏事若不成請斬臣七段  
緣失蜜王向漢忠赤特望勅書宣慰使其感恩元宗覽  
表許之十二年又遣使朝貢

乾元元年七月與西域九國遣兵助國討逆肅宗令赴  
朔方行營

曇陵國

曇陵吐火羅之屬國也居大洲中其風俗土宜與吐火羅國同

貞觀十六年遣使朝貢

康國

康國本康居之苗裔也其王本姓溫氏其人土著役屬於突厥先居祁連之北昭武城爲匈奴所破南依葱嶺遂有其地支庶強盛分王鄰國皆以昭武爲姓氏不忘本也俗多蒲萄酒勝兵三千人深目高鼻多鬚髯生子必以蜜食口中以膠置手內欲其成長口嘗甘言持錢

如膠之粘物習善商賈爭分銖之利男子二十卽送之他國來過中夏利之所在無所不至以十二月爲歲首有婆羅門爲其占星候氣以定吉凶至十月鼓舞乞寒以水相潑盛爲戲樂

武德七年其王屈朮支遣使獻名馬

貞觀九年七月獻獅子太宗嘉其遠來使秘書監虞世南爲之賦十一月又獻金桃銀桃詔令植於苑囿永徽中其國頻遣使告爲大食所攻兼徵賦稅

顯慶三年高宗遣果毅董寄生列其所居城爲康居都

督府仍以其王拂呼縵為都督  
萬歲通天元年則天封其大首領篤婆鉢提為王鉢提  
尋卒又冊立其子泥涅師師神龍中泥涅師師卒又冊  
立其子突昏

開元初屢遣使獻鑠子甲水晶栴及越諾侏儒人胡旋  
女子兼狗豹之類十九年其王烏勒伽表請封其子咄  
曷為曹國王默啜為米國王許之二十七年烏勒卒遣  
使冊咄曷襲其父位  
天寶三載又封為欽化王其母可敦封為郡夫人十二

載十三載並遣使朝貢

盤盤國

盤盤國在林邑西南海曲中北與林邑隔小海自交州  
船行四十日乃至其國與狼牙脩國為鄰習俗與扶南  
畧同以路遠不與中國通梁大同時來朝貢  
貞觀九年朝貢使至

朱俱波國

朱俱波在葱嶺之北二百里勝兵三千人其俗崇飾佛  
法文字同於婆羅門西與渴盤陀為鄰去瓜州三千八

百里

貞觀十一年十二月朝貢使至

甘棠國

甘棠在大海之南崑崙人也

貞觀十年與朱俱波國朝貢同日至太宗謂羣臣曰南荒西域自遠而至其故何哉房元齡曰當中國又安帝德遐被也太宗曰誠如公言向使中國不安何緣而至朕何以堪之觀此蕃使益懷畏懼所望公等匡朕不逮也

罽賓國

罽賓在葱嶺之南其地川瀆水皆南流注於南海人皆乘象土宜種稻多甘蔗葡萄草木凌寒不死尤信佛法南去舍衛國三千五百里罕通上國聞中夏有聖君故遣使來朝

貞觀十一年遣使至上謂長孫無忌曰朕卽位之初有上書者或言人主必須威權獨運不得委羣下或欲耀兵振武懾服四夷惟魏徵勸朕偃武興文布德施惠中國既安遠人自服朕從其語天下大寧絕域君長皆來

唐會要 卷九十九  
朝貢九夷重譯相望於道此皆魏徵之力也朕之任用豈不得人二十二年其國遣使獻俱物頭花丹白相間其香遠聞

永徽二年獻耨特鼠喙尖尾赤能食蛇螫者以尿塗瘡即愈

顯慶三年訪其國俗云王始祖馨孽今王曰曷擯支父子傳位已十二代其年列其城爲修鮮都督府龍朔初授其王修鮮等十一州諸軍事兼修鮮都督

開元七年遣使獻天文大經及秘方奇藥八年詔遣冊

其王爲葛羅達支特勒二十七年其王烏散特勒灑以年老上表請以嫡子拂赫闕婆嗣位許之仍降使冊命天寶四載又冊其子勃葡準爲龔闕賓及烏菴國王仍授右驍衛將軍

乾元元年又遣使朝貢

### 流鬼國

流鬼去京師一萬五千里直黑水靺鞨東北少海之北三面阻海多沮澤有魚鹽之利地氣早寒每堅冰之後以木廣六寸長七尺施系於其上以踐層冰逐其奔獸

俗多狗以其皮毛為裘褐勝兵萬人南與莫曳鞞鞞鄰  
接未嘗通聘中國

貞觀十四年其王更三譯而來朝貢授騎都尉

史國

史國居近獨莫水北與康國同域中有神祠每祭牛羊  
口自隋以來國漸強盛乃創置乞史城都邑二萬餘家  
貞觀十六年正月朝貢使至

顯慶三年遣果毅董寄生列其所治為陸沙州以其王  
昭武失阿曷為刺史

開元十五年其王阿忽必多延屯遣使獻胡旋女子及  
豹二十七年其延屯卒冊立其子阿忽鉢為王二十九  
年其王斯謹提立首領勃帝未施朝貢天寶中詔使其  
國為來威國其那色波國亦謂之小史國為史國役屬

拂菻國

拂菻一名大秦國在西海之北東南與波斯接地方萬  
里列城四百邑居連屬其宮室柱梲多以水晶琉璃為  
之有貴臣十二人共治國政常使一人將囊隨王車百  
姓有事者卽以事投囊中王至宮省發理其枉直其王

無常人簡賢者立之國有災異及風雨不時卽廢之有鳥似鶴其色綠色常在王邊倚枕上坐每進食有毒其鳥輒鳴戶十萬餘南臨大海城東面有一大門高二十丈自外至王室飾以黃金凡有大門三重第二大門之樓懸一金杵以金丸十二枚屬於衡端以候日之十二時焉爲一金人其大如人立於側每至一時其金丸輒落鏗然發聲金人卽應聲引唱以紀日時毫釐無差其殿以瑟瑟爲柱黃金爲地象牙爲門扇香木爲棟梁無瓦以白石未塗屋上光潤如玉石至盛夏之時引水潛

流上徧屋宇機制巧密人莫之知觀者惟聞屋上鳴泉俄見四簷飛溜懸汲如瀑激氣成涼風其巧如此有羊羔生於土中其國人候其欲萌乃築牆以護之防外獸所食然其臍與地連割之則死惟人著甲走馬及擊鼓以駭之其羔驚鳴而臍絕便逐水草諸珍寶多出其國隋煬帝常欲通之竟不能致

貞觀十七年其王波多力遣使獻赤玻璃石綠金精等物太宗降璽書答慰自大食強盛漸陵諸國遣將伐其都乃歲輸金帛臣屬大食焉



乾封元年遣使獸底也伽大足元年復遣使朝貢

開元十年正月遣吐火羅大首領獻獅子二羚羊二四月又遣大德僧來朝

烏菴國

烏菴國在中天竺南一名烏枝那地方千餘里百姓殷實人性懦弱頗詭詐尤工禁呪之術篤信佛法與天竺同而天竺不及之自古未通中國焉

貞觀十六年十一月朝獻使至  
開元八年四月遣使冊立其王時大食東與烏菴鄰境

煽誘為虐其王與骨咄王俱位王皆守節不應亦潛輸款誠元宗深美之故並降冊名

耨陀洹國

墮和羅西北其王姓察失利名婆那子婆末其國海行五月至廣州土無蠶桑以白氎朝霞布為衣穀有稻麥俗皆樓居謂之干欄父母死停喪在室輒數日不食燔屍之後男女並剔髮臨池先浴然後進食

貞觀十八年遣使來朝貢又獻婆律膏白鸚鵡首有十紅毛齊於翅

貞觀二十一年三月使至朝貢與似沒役樂國康國同鄰  
 出好馬  
 悉立國  
 悉立在吐蕃西南戶五萬勝兵五千人其地有城邑村落咸依溪澗男夫以繒綵纏頭衣氍婦人辮髮著短裙

唐會要卷一百

宋國悉立王

撰

悉匿國

悉匿北接石國其俗不好商賈風俗與康國略同

貞觀二十年三月使至朝貢與似沒役樂國康國同鄰

出好馬

悉立國

悉立在吐蕃西南戶五萬勝兵五千人其地有城邑村落咸依溪澗男夫以繒綵纏頭衣氍婦人辮髮著短裙

婚姻簡略不行財禮以蒸報為俗多水牛宜秔稻喪制以黑為衣一年就吉羈事吐蕃自古未通中國

貞觀二十年閏三月朝貢使至

求拔國

求拔或云章揭拔本西羌種也在悉立西南居四山之內近西移出山西接東天竺遂改衣服變西羌之習因而附焉勝兵二千無城郭好為寇掠商旅患之

貞觀二十五年因悉立而朝貢使至

俱蘭國

前亦名俱羅弩國與吐火羅接南底雪山地險窄物產惟出金精

貞觀二十年閏三月朝貢使至

骨利幹國

骨利幹處北方瀚海之北二俟斤同居勝兵四千五百口萬餘人草多百合地出名馬其國北接水海晝長夕短日沒後天色正曛煮一羊胛纔熟而東方已曙蓋近日出之所也貞觀二十一年正月內附

訶陵國

訶陵在真臘之南海中洲王之所居堅木爲城造大屋重閣以象爲牀以椰花椰子爲酒飲之亦醉有毒女與常人居止宿處卽令身上生瘡與之交會卽死若旋液露著草木卽枯

貞觀二十二年朝貢使至

元和八年遣使獻僧祇僮及五色鸚鵡頻伽鳥并異香十三年十一月獻僧祇女二人及玳瑁瑳生犀等

婆登國

婆登在林邑之南海行二月東與訶陵西與迷黎連接

北鄰大海風俗與訶陵國同種穀每月一熟亦有文字書之于貝多葉其死者口實以金又以金釧貫于四肢然後加以婆律膏及沈檀龍腦等香積薪以燔之

貞觀二十一年六月朝獻使至

波斯國

波斯在京師西一萬五千里東與吐火羅康國接北鄰突厥之可薩部西北距弗林西南濱海戶數十萬其王初嗣位便密選諸子才堪承統者書其名字封而藏之王死後大臣與王之羣子共發封而視之奉所書名爲

王焉俗事天地水火諸神西域諸胡事火祆者皆詣波斯受法焉其事神以麝香和蘇塗鬚點額及於耳鼻用以爲敬以六月一日爲歲首繫囚無年限惟王代立則釋之地多名馬駿者日行七百里又多駿犬今所謂波斯犬也出驢及大驢

貞觀二十一年其王伊嗣候遣使朝貢

龍朔元年其國王卑路斯使奏頻被大食侵擾請兵救援之詔遣隴州南由令王名遠充使西域分置州縣因列其地疾陵城爲波斯都督府授卑路斯爲都督是後

數遣使貢獻焉咸亨中卑路斯自來朝貢高宗甚加恩賜拜右武衛將軍

儀鳳三年令吏部侍郎裴行儉將兵冊送卑路斯還波斯國行儉以路遠至安西碎葉而還卑路斯獨返不得入其國漸爲大食所侵客於吐火羅二十餘年部落數千人後漸離散至景龍二年來朝拜爲左威將軍無何病卒其國遂滅西部眾猶存自開元十年至天寶六載凡十遣使朝貢獻方物夏四月遣使獻瑪瑙牀九載獻火毛繡舞筵長毛繡舞筵無孔眞珠至大曆六年九月

唐會要 卷一百  
遣使獻眞珠等

都播國

都播鐵勒之別種也其地北瀕小海西堅昆南迴紇十  
三月行前代未之通也分爲三部皆自統攝其俗無歲  
時結草爲廬無牛羊不知耕種土多百合取其根以爲  
糲捕魚鳥食之衣貂鹿之皮貧者亦緝鳥羽爲服婚姻  
富者用馬貧者用鹿皮爲聘禮國無刑罰偷盜者徵其  
賦聞骨利幹來通亦遣使朝貢

貞觀二十一年十一月朝貢使至

結骨國

結骨在迴紇西北三千里勝兵八萬口數十萬南阻貪  
漫山有水從迴紇北流踰山經其國人並依水而居身  
悉長大皙面綠睛朱髮有黑髮以爲不祥人皆勁勇鄰  
國憚之其大與突厥同而婚姻無財聘性多淫泆與外  
人通者不忌其壻死喪刀勢其面火葬收其骨踰年而  
葬以木爲室覆以木皮天每雨鐵收而用之以爲刀劍  
甚銛利若獵獸皆乘木馬升降山磴追赴若飛其北有  
騶馬國鄰北海畜騶馬而不乘但取其酪充飧而已貌

類結骨而不敦鄰好交相侵伐貞觀六年遣王義宏將命鎮撫二十二年結骨國君長遂身自入朝云臣已一心歸國望得國家官職執笏而還遂授左屯衛大將軍堅昆都督開元中安西都護蓋嘉運撰西域記云堅昆國人皆赤髮綠睛其有黑髮黑睛者則李陵之後故其人稱是都尉苗裔亦有由然今有改稱紇圻斯者亦是北夷舊號臣按國史敘鐵勒種類云伊吾以西焉耆以北旁白山則有契弊烏護紇骨子其契弊卽契苾也烏護則烏紇也後爲迴鶻其紇骨卽紇圻斯也由是而言

蓋鐵勒之種嘗以稱迴鶻矣其轉爲黠戛斯者蓋夷音有緩急卽傳譯語不同其或稱戛戛斯者語急而然耳訪於譯史云黠戛是黃頭赤面義蓋迴鶻呼之如此今使者稱自有此名未知孰是

會昌三年其國遣使注吾合索

上聲呼之

等七人來朝兼獻

馬二匹以其久不修貢且莫詳更改之名中旨訪求唯賈耽所撰四夷述具載黠戛斯之號然後知耽之通習荒情洽而不誤先是迴鶻背恩德侵劫諸部落又擅入靈州以爲天亡不可容也乃命河東等道遣兵討之正

月命河東兵大破迴鶻於殺胡山就帳中奉太和公主歸於我軍可汗亦與數十騎踰山道走黠戛斯乘其破亡遂有其國二月遣使注吾合索等七人來朝并獻名馬且憑大唐威德求冊命焉四年上命太僕卿兼御史中丞趙蕃持節宣慰五年五月勅我國家光宅四海君臨八荒聲教所覃冊命咸被況乎族稱宗姓地接封疆爰申建立之恩用廣懷來之道有加常典得不敬承黠戛斯國王生窮陰之鄉稟五朔之氣少卿之後胄裔且異於蕃夷大漠之中英傑自雄於種落日者居於絕徼

隔以強鄰空馳向化之心莫通事大之禮旋能奮其武勇清彼朔陲萬里歸誠重譯而至時旣當於無外義必在於固存是用特降徽章載明深懇加其美號錫以冊書貽厥後昆遂荒有北舉茲盛典彰示遠戎祇服寵光永孚恩化可冊爲宗英雄武誠明可汗命右散騎常侍兼御史中丞李棡持節充冊使仍命有司擇日備禮冊命六年九月勅去歲先帝冊立黠戛斯爲可汗雖有成命旋屬朝廷變故未果遵行今欲遣使且展封告之儀續行先帝之意又慮深僻小國不足與之抗衡迴鶻向



殘不合遽有建置事新體大須歸至當必詢於眾方免有疑宜令中書門下五品以上御史臺尚書省四品以上集議聞奏大中元年遂命鴻臚卿御史中丞李業持節再冊命焉

天竺國

天竺卽漢之身毒或云摩伽佗或云婆羅門地在葱嶺之南去月氏東南數千里地方三萬餘里其中分爲五南天竺南際大海北天竺北距雪山四周有山爲壁南面一谷通爲國門東天竺東際大海與扶南連但隔小

海而已西天竺與罽賓波斯相接中天竺據四天竺之間國並有王而俱以天竺爲名隋煬帝志通西域諸國多至惟天竺不通武德中國大亂王尸羅逸多勒兵象不解鞍士不釋甲六載而四天竺之君皆北面以臣之貞觀初年中國沙門元奘至其中國天竺王尸羅逸多謂元奘曰吾聞中國有聖王出作秦王破陣樂試爲我說秦王之爲人也元奘具言聖德王曰信如所言我當自朝也至十五年自稱摩伽佗王遣使朝貢上乃遣雲騎尉梁懷璠往通其國尸羅逸多驚問諸國人曰自古

唐會要 卷一百  
亦有摩訶震旦使人至吾國乎皆曰未之有也乃遣使  
隨懷敬來朝至二十二年四月遣使右衛長史王元策  
奉使天竺國至尸羅逸多死其國大亂發兵拒之元策  
禦戰不敵挺身宵遁至吐蕃發精銳千二百人并泥婆  
羅國兵七千騎元策與副使蔣師仁率二國兵大破之  
虜其王以歸太宗大悅謂侍臣曰夫人耳目玩於聲色  
口鼻耽於臭味此敗德之源若天竺不劫我使人豈爲  
俘虜耶昔中山以貪寶取傲蜀侯以金牛致滅莫不由  
之是時就其國得方士那邏邇婆娑寐自言年二百云  
有長生之術上深禮之館於金鷄門內造延年藥合

兵部尙書崔敦禮監主之使天下采諸奇藥  
異石延歷歲月藥成服之無效後放還本國

天授三年東天竺王摩羅枝摩西天竺王尸羅逸多南  
天竺王遮邏其跋邏婆北天竺王婁其那那中天竺王  
地婆西那並來朝貢及中宗睿宗兩朝並獻方物  
開元三年二月遣使瞿雲惠成來朝八年五月南天竺  
遣使獻豹皮五色能言鸚鵡又奏請以戰象兵馬討大  
食吐蕃求有以名其軍制書嘉焉號爲懷德軍九月南  
天竺王尸利那羅僧伽寶多枝摩爲國造寺上表乞寺  
額勅以歸化爲名賜十一月遣使冊利那羅僧伽寶多

唐會要 卷一百  
爲南天竺王遣使來朝十七年六月北天竺國王三藏  
沙門僧密多獻質汗等藥十九年十月中天竺國王伊  
沙伏摩遣大德僧來獻方物二十九年三月中天竺國  
王李承恩來朝授遊擊將軍放還天寶中累遣使朝貢

葛邏祿國

葛邏祿本突厥之族也在北庭之北金山之西與車鼻  
部落相接薛延陀破滅之後車鼻人眾漸盛葛邏祿率  
其下以歸之及高侃之經略車鼻也葛邏祿相繼來降  
仍發兵助討後車鼻破滅葛邏祿謀刺婆荀踏實力三

部落並詣闕朝見顯慶二年置陰山大漠元池三都督  
府以其首領爲都督二族當東西兩突厥之間常視其  
興衰附叛不常後稍南徙自號三姓兵彊勇於鬪延州  
以西突厥皆畏之開元初與迴鶻拔悉密等攻殺突騎  
施烏蘇米施可汗三年與拔悉密可汗同奉表兼獻馬  
至闕下其年冬又與迴鶻同擊破拔悉密部落其可汗  
阿史那施奔北庭後朝於京師十三年授阿史那施左  
武衛將軍乾元中率拔悉密可汗南奔後葛邏祿與九姓  
部落復立迴鶻瞰葉護爲可汗朝廷尋遣使封爲奉義

王仍號懷仁可汗自此後葛祿在烏德健山左右者別置一部督隸屬九姓迴鶻其在金山及北庭管內者別立葉護每歲朝貢十一年葉護頓毗伽生擒突厥帥阿布思送於闕庭授開府儀同三司改封金山郡王至德後部眾漸盛與迴鶻爲敵國仍移居十姓可汗之故地今碎葉怛邏斯諸城盡爲所踞然阻迴鶻近歲朝貢不能自通

泥婆羅國

泥婆羅在吐蕃之西樂陵川土多赤銅其俗翦髮與眉

齊穿耳植以竹筍綬至肩者以爲妙麗食用手其器皆銅多商賈少田作鑄銅爲錢面文爲人背文爲馬牛不穿孔衣服以一幅布蔽身數日一盥浴以板爲屋壁皆雕畫俗重博戲頗解推測盈虛皆通曆術祀天神鑄石爲像每日清水浴神烹羊而祭其王那陵提婆身著珍珠諸寶垂纓耳金鉤玉鐙佩服莊嚴坐師子牀內嘗散花燃香大臣皆坐地不藉左右持兵數百人列侍宮中有七重樓覆以銅瓦楹棋皆飾以珠寶四隅置銅槽下有金龍口激水仰注槽中初提婆之父爲其叔所殺提

唐會要 卷一百  
婆出奔吐蕃納之遂臣吐蕃貞觀中使者李義使天竺  
道其國提婆大喜延使者觀阿耨婆彌池池週迴二十  
餘丈以物投之則生烟焰懸釜而炊須臾可熟二十一  
年遣使獻波稜菜渾提葱

永徽二年其王尸利那連陀羅遣使朝貢

大食國

大食本在波斯之西大業中有波斯胡糾合亡命渡恆  
曷水劫奪商旅其眾漸盛遂割據波斯西境自立爲王  
其王姓大食氏名噉密莫末尼自云有國已三十四年

歷三主矣其國男兒黑而多鬚鼻大而長女子白皙行  
必障面文字旁行日五拜天神不飲酒舉樂有禮堂容  
數百人率七日王高坐爲下說法曰死敵者生天上殺  
敵致福故俗勇於戰鬥土多沙石不堪耕種唯食駝馬  
不食豕肉西隣大海常遣人乘船將衣糧入海經八年  
而未極西岸海中有一方石上有樹幹赤葉青上總生  
小兒長六寸見人皆笑動其手脚旣著樹枝若使摘取  
一枝小兒便死

永徽二年八月大食遣朝貢至龍朔中擊破波斯又破

唐書要 卷一百  
拂菻始有麪米之屬又南侵婆羅門吞諸國併勝兵四十餘萬開元初遣使來朝進良馬寶鈿帶其使謁見平立不拜云本國惟拜天神雖見王亦不拜所司屢詰責之其使遂依漢法致拜其時康國石國皆臣屬十三年遣使蘇梨滿等十三人獻方物授果毅賜緋袍銀帶遣還其境東西萬里東與突騎施相接焉又案賈耽四夷述云隋開皇中大食族中有孤列種代爲酋長孤列種中又有兩姓一號盆尼夷深一號盤泥末換其奚深後有摩訶末者勇健多智眾立之爲王東西征伐開地三

千里兼剋夏獵一名鈿音所鑿反城摩訶末後十四代至末換末換殺其兄伊疾而自立復殘忍其下怨之有呼羅珊末麤人並波悉林舉義兵應者悉令著皂衣旬日間眾盛數萬鼓行而西生擒末換殺之遂求得夷深種阿蒲羅拔立之自後末換以前種人謂之白衣大食自阿蒲羅拔以後改爲黑衣大食阿蒲羅拔卒立其弟阿蒲恭拂至德初遣使朝貢代宗之爲元帥亦用其國兵以收兩都寶應初其使又至恭拂卒子迷地立迷地卒子牟栖立牟栖卒弟訶論立貞元二年與吐蕃爲勁敵蕃

兵大半西禦大食故鮮為邊患其力不足也至十四年  
丁卯九月以黑衣大食使含嗟焉雞沙北三人並為中  
郎將放還蕃

火辭彌國

火辭彌與波斯接風俗亦與波斯同

貞觀十八年三月遣使貢方物與摩羅遊使者偕來

駁馬國

駁馬其地近北海在突厥北去京師一萬四千里經突  
厥大部落五所乃至勝兵三萬馬萬匹地寒至冬積雪

樹木不沒者一二尺至雪消逐陽坡以馬耕種五穀馬  
色並駁故以為國號其使云去鬼國六十日行其國人  
夜遊晝隱眼鼻耳與中國人同口在頂上土無米粟噉  
鹿與蛇

永徽二年十一月朝貢使至

金利毗迦國

金利毗迦在京師西南四萬餘里行經日巨國訶陵國  
摩訶國新國多薩國者埋國婆婁國多郎婆黃國摩羅  
遊國真臘國林邑國乃至廣州東去至物國二千里西

去赤土國一千五百里南距婆庭舍衣朝霞白氎每食先泥上鋪席而後坐其國王名本多陽牙前有隊仗甲盔甲用貝多樹皮風俗物產與真臘國同

多摩菴國

多摩菴居於南海島中使云其王先祖骨利龍之子利常得一鳥卵剖之得一女子容色殊妙因以為妻今尸羅劬傭即其後也

顯慶四年二月朝貢使至

蝦夷國

蝦夷海島中小國也其使鬚至長四尺尤善弓矢插箭於首令人戴瓠而立數十步射之無不中者顯慶四年十月隨倭國使至入朝

哥羅舍分國

哥羅舍分在南海之南接墮和羅國其國王名蒲越摩伽精兵二萬人其使以顯慶五年發本國至龍朔二年五月到京

日本國

日本倭國之別種以其國在日邊故以日本國為名或



以倭國自惡其名不雅改爲日本或云日本舊小國吞併倭國之地其人入朝者多自矜大不以實對故中國疑焉

長安三年遣其大臣朝臣真人來朝貢方物朝臣真人者猶中國戶部尙書冠進德冠其項爲花分而四散身服紫袍以帛爲腰帶好讀經史解屬文容止閑雅可人宴之麟德殿授司膳卿而還

開元初又遣使來朝因請士授經詔四門助教趙元默就鴻臚教之乃遣元默闊幅布以爲束脩之禮題云白

龜元年調布人亦疑其僞爲題所得賜賚盡市史籍泛海而還其偏使朝臣仲滿慕中國之風因留不去改姓名爲朝衡歷仕左補闕終右常侍安南都護

### 師子國

師子在西南大海中洲宋始朝貢其洲中有山名稜伽多奇寶古佛遊處國中有王以一善化人皆以清淨學道爲勝

天寶五載正月王尸羅迷伽遣使至獻大珠鈿金寶瓔珞及貝葉鈔寫大般若經一部細白氎四十張

多蔑國

多蔑居大海之北周迴可兩月行南至海西俱遊國北  
波刺國東真陀洹國其王姓摩伽名失利戶口極眾置  
三十州又役屬他國有城郭樓櫓宮殿並瓦木常侍衛  
兵可四千人雖有弓箭刀楯甲鞘而無戰陣有刑典書  
記及婚聘之禮事佛及神亦以十二月為歲首畜有犀  
象馬牛果有檳榔子其桃棗瓜李及園蔬五穀與中國  
不殊

多福國

龍朔元年八月其王難婆修疆宜說遣朝貢使至

耽羅國

耽羅在新羅武州海上居山島上周迴並接於海北去  
百濟可五日行其王姓儒李名都羅無城隍分作五部  
落其屋宇為圓牆以草蓋之戶口有八千有弓刀楯稍  
無文記唯事鬼神常役屬百濟

龍朔元年八月朝貢使至

拘婁蜜國

拘婁蜜在林邑之西陸路三月行山居饒象並養之以

唐會要 卷一百一十五  
供用顯慶元年閏正月來朝貢在盤盤致物國東南海  
路一月行南距婆利國十日行東去不述國五日行西  
北去文單國六日行風俗物產與赤土國墮和羅國略  
同

永徽六年八月遣使獻五色鸚鵡

驃國

貞元十八年春正月南詔使來朝驃國王始遣其弟悉  
利移來朝華言謂之驃自謂突羅朱閣婆人謂之徒里  
掘自古來未嘗通中國魏晉間有著西南異方志及南

中八郡志者云永昌古哀牢國也傳聞永昌西南三千  
里有驃國君臣父子長幼有序然無見史傳者今聞南  
詔異牟尋歸附心慕之乃因南詔重譯遣子朝貢東北  
距南詔咩苴城六千八百里凡去上都一萬四千里在  
永昌故郡南二千餘里其境東西三千里往來通聘者  
迦羅婆提等二十國役屬者道林王等九城食境土者  
羅君潛等二百九十八部落東鄰真臘國西接東天竺  
國南溟海北通南詔些樂城界其王姓因沒長名摩羅  
惹其國相名摩訶斯那其王近適則輿以金繩牀遠適

則乘象嬪御甚眾侍御常數百人其羅城構以甌篋周  
一百六十里壕岸亦構以甌相傳本是舍利佛城內有  
居人數萬家佛寺百餘區其堂宇皆錯以金銀渥以丹  
彩地以紫鑿覆以錦罽其俗好生惡殺其土宜菽粟稻  
梁無麻麥其治無刑名桎梏之具犯罪者以竹五十本  
束之復犯者笞其背數止五輕者止三殺人者戮之男  
女七歲則落髮止寺依桑門至二十歲不悟佛理乃復  
爲居人其衣服悉以白氎與朝霞繞腰而已不衣繒帛  
云出於蠶爲傷生也又獻其國樂凡二十二曲與樂工

二十五人來朝樂曲皆演釋氏經論之詞意二十一年  
四月封彌臣國嗣王樂道勿禮爲彌臣國王焉  
咸通三年二月遣使貢方物

占卑國

大中六年十二月占卑國佛邪葛等六人來朝兼獻象  
宰相魏暮以性不安中土請還其使從之  
咸通十二年二月復遣使朝貢

雜錄

故事西蕃諸國通唐使處悉置銅魚雄雌相合各十二

隻皆銘其國名第一至十二雄者留在內雌者付本國如國使正月來者齎第一魚餘月准此閏月齎本月而已校其雌雄合乃依常禮待之差謬則推按聞奏至開元一十六年十一月五日鴻臚卿舉舊章奏曰近緣突騎施背叛蕃國銅魚多有散失望令所司復給貞觀二年六月十六日勅諸蕃使人所娶得漢婦女爲妾者並不得將還蕃

四年三月諸蕃君長詣闕請太宗爲天可汗乃下制令後璽書賜西域北荒之君長皆稱皇帝天可汗諸蕃渠帥有死亡者必下詔冊立其後嗣焉統制四夷自此始也

二十一年三月十一日以遠夷各貢方物其草木雜物有異於常者詔所司詳錄焉葉護獻馬乳葡萄一房長二尺子亦稍大其色紫摩伽國獻菩提樹一名波羅葉似白楊康國獻黃桃大如鵝卵其色如金亦呼金桃伽毘國獻鬱金香葉似麥門冬九月花開狀如芙蓉其色紫碧香聞數十步華而不實欲種取其根罽賓國獻俱物頭花其花丹白相間而香遠聞伽失畢國獻泥樓鉢

羅花葉類荷葉圓缺其花色碧而蕊黃香芳數十步健  
達國獻佛土葉一莖五葉花赤中心正黃而蕊紫色泥  
婆羅國獻波稜菜類紅藍花實似蒺藜火熟之能益食  
味又酢菜狀如菜闊而長味如美鮮苦菜狀如苣其葉  
闊味雖少苦久食益人胡芹狀如芹而味香渾提葱其  
狀如葱而白辛嗅藥其狀如蘭凌冬而青收乾作末味  
如桂椒其根能愈氣疾薛延陀獻拔蘭鹿毛如牛角大  
如麕西蕃突厥獻馬蹄羊其蹄似馬波斯國獻活褥蛇  
其狀如鼠而色青身長七八寸能入穴取鼠西蕃咄祿

可汗獻金卵鷄殼烏殼也雕刻作禽獸而塗以金西蕃  
胡國出石蜜中國貴之太宗遣使至摩伽陀國取其法  
令楊州煎蔗之汁於中廚自造焉色味逾於西域所出  
者葡萄酒西域有之前世或有貢獻及破高昌收馬乳  
葡萄實於苑中種之并得其酒法自損益造酒酒成凡  
有八色芳香酷烈味兼醞醱既頒賜羣臣京中始識其  
味

天寶二年四月二十五日上因問諸蕃諸國遠近鴻臚  
卿王忠嗣上言曰臣謹按西域圖陀拔恩單國在疎勒

西南二萬五千里東至勃達國一月程西至沮滿國一月程南至羅刹支國十五日程北至海兩月程羅刹支國東至都盤國十五日程西至沙蘭國二十日程南至大食國二十日程北至陀拔國十五日程都盤國東至大食國十五日程西至羅刹支國十五日程南至大食國二十五日程北至勃達國一月程勃達國東至大食國兩月程西北至岐蘭國二十日程南至都盤國一月程北至大食國一月程河沒國東至南陀拔國十五日程西北至岐蘭國二十日程從南至沙蘭國一月程從

北至海兩月程岐蘭國東南至河沒國二十日程西至大食國兩月程南至沮滿國二十日程北至海五日程沮滿國東至陀拔國一月程西至大食國兩月程南至大食國一月程北至岐蘭國十日程沙蘭國東至羅刹支國二十五日程南至大食國二十五日程北至沮滿國二十五日程石國東至拔汗那國一百里西南至東米國五百里罽賓國在踈勒西南四千里東至俱蘭陀國七百里西至大食國一千里南至婆羅門國五百里北至吐火羅國二百里東米國在安國西北二千里東

至碎葉國五千里西南至石國一千五百里南至拔汗那國一千五百里史國在踈勒西四千里東至俱蜜國一千里西至大食國二千里南至吐火羅國一百里西北至康國七百里

證聖元年九月五日勅蕃國使入朝其糧料各分等第給南天竺北天竺波斯大食等國使宜給六箇月糧尸利佛誓真臘訶陵等國使給五箇月糧林邑國使給三箇月糧

聖歷三年三月六日勅東至高麗國南至真臘國西至

波斯吐蕃及堅昆都督府北至契丹突厥靺鞨並爲入番以外爲絕域其使應給料各依式

開元四年正月九日勅靺鞨新羅吐蕃先無里數每遣使給賜宜準七千里以上給付也

大歷十四年七月詔迴紇諸蕃住京師者各服其國之服不得與漢相參

歸降官位

顯慶三年八月十四日置懷德大將軍正三品歸化將軍從三品以授初投首領仍隸屬諸衛不置員數及月



俸料

總章元年十一月授婆羅門盧伽逸多懷化大將軍  
貞元十一年正月十九日置懷化大將軍正三品每月  
料錢四十五千文雜料三十五千文歸德將軍從三品  
料錢四十千文懷化中郎將正四品料錢三十七千文  
歸德中郎將從四品料錢三十五千文懷化郎將正五  
品料錢三十二千文歸德郎將從五品料錢三十千文  
懷化司階正六品料錢二十五千文歸德司階從六品  
料錢二十三千文懷化中候正七品料錢十八千文歸

德中候從七品料錢十七千文懷化司戈正八品料錢  
十五千文歸德司戈從八品料錢十四千文懷化執戟  
長上正九品料錢十一千文歸德執戟長上從九品料  
錢十千文勅準六典應投幕蕃官前承未置今蕃人向  
化近日漸多名位高卑須有等級其增置官品及料錢  
等宜依前件其月以歸降吐蕃論乞髯湯沒藏悉諾碑  
爲歸德將軍會昌二年八月制歸義軍使特進檢校工  
部尚書兼右金吾衛大將軍同正懷化郡王嗚沒斯賜  
姓李名思忠冠軍大將軍左衛大將軍同正寧邊郡公

歷支賜姓李名思正冠軍大將軍左衛大將軍同正昌  
化郡公習聞啜賜姓李名思義冠軍大將軍左衛大將  
軍同正寧朔郡公烏羅思賜姓李名思禮守右領軍大  
將軍同正寧塞郡公受邪勿可檢校右散騎常侍右領  
軍衛大將軍國正充歸義軍副使仍賜姓李名宏順制  
李思正弟冠軍大將軍右驍衛大將軍同正昌化郡公  
李思義母可封鴈門郡君李思忠男封中散大夫檢校  
殿中少監仍賜紫金魚袋賜名繼美

天祐元年六月授福建道佛齊國入朝進奉使都番長

蒲訶粟寧遠將軍

